



JORNAL

do

Parlamento Nacional

VI. LEGISLATURA

1.ª SESSÃO LEGISLATIVA (2023-2028)

REUNIÃO PLENÁRIA DE 11 DE JULHO DE 2023

Presidente: Ex.^{ma} Sr.^a Maria Fernanda Lay

Vice-Presidentes: Ex.^{mos} Srs. Maria Teresinha da Silva Viegas
Alexandrino Afonso Nunes

Secretária: Ex.^{ma} Sr.^a Virgínia Ana Belo

Vice-Secretárias: Ex.^{ma} Sr.^a Maria Teresa da Silva Gusmão

SUMÁRIO

Sr.^a Presidente loke sessão plenária iha tuku 9 liu minuto 25 dadeer.

Antes Ordem do Dia – Leitura ba agenda trabalho loron ne'e nian.

Leitura ba naran husi Deputado hirak-ne'ebé compõe mesa Comissão A Parlamento Nacional nian; leitura ba lista naran husi Deputado sira husi partido FRETILIN no CNRT nian ne'ebé halo parte ba delegação Parlamento Nacional nian ba União

Interparlamentar (UIP) no ba Assembleia Parlamentar Asiática (APA).

Liutiha ida-ne'e, halo leitura no discussão ba voto pesar ba Prof. José João Conceição Gonçalves Mattoso nia mate, ne'ebé ikusmai aprovado.

Tuirmai, Bancada KHUNTO hato'o declaração política ne'ebé ko'alia kona-ba complexidade husi problema rai no propriedade iha Timor-Leste, no propõe mós solução balu atu Governo considera.

Sr.^a Deputada no Sr. Deputado sira, iha intervenção diversa, aborda kona-ba: esforço ne'ebé IX Governo halo ona hodi responde ba desastre natural, liu-liu inundação, ne'ebé acontece iha município balu; exoneração ne'ebé membro Governo foun balu halo ba funcionário contratado sira; irrigação iha Betano ne'ebé nia condição aat tebes; comunidade sira iha posto administrativo Alas ne'ebé tinan-tinan sempre sofre tanba inundação; atraso iha pagamento subsídio idoso sira-nian; ró Nakroma ne'ebé cada tinan Governo tau orçamento atu halo manutenção maibé continua aat; pessoal recrutado sira husi RAEOA ne'ebé seidauk simu sira-nia remuneração; professor contratado hamutuk 250 iha Díli ne'ebé seidauk simu salário; condição aat husi estrada ne'ebé liga município Baucau ho município Viqueque, no mós iha Maliana; necessidade ato coloca segurança civil iha fatin turístico iha Cristo Rei no João Paulo II; casa de banho aat no soe fo'er arbiru iha Areia Branca; condição ponte nian ne'ebé aat iha suco Uma-Tolu, posto administrativo Lacluta município Viqueque; razão Governo nian hodi hapara obra estrada Baguia ba Laga no Uai-Aka ba Quelicai; inundação iha posto administrativo Lolotoe ne'ebé estraga comunidade nia uma no estraga mós estrada; especulação sasán folin husi vendedor sira iha período desastre natural; exoneração ba funcionário recrutado sira; resolução iha V Legislatura kona-ba devolução de restos mortais; concurso ba projeto sira iha RAEOA ne'ebé desconfia iha tendência favoritismo no obra Jardim Lifau no Jardim Oebau nian ne'ebé abandonado hela; falta caderneta passaporte; atraso iha pagamento ba subsídio bolsa da mãe; trabalhador casual husi programa Cesta Básica ne'ebé CLN seidauk selu sira-nia remuneração to'o agora; pensão ne'ebé continua

transfere ba sira-nia conta bancária ex-Deputado balun nian maske nia na'in mate tiha ona; execução orçamental ministério balu nian iha VIII Governo ne'ebé ki'ik tebes, liu-liu Centro Logística Nacional; falta laboratório para halo teste ba foos importado sira; subida preço sasán iha mercado; falta domínio lia-português husi Deputado sira iha Parlamento Nacional nune'e mós membro governo no docente sira; lixo ne'ebé soe arbiru iha cidade Díli laran; karreta transporta lixo nian ne'ebé la apropriado,

Ordem do Dia – Assembleia halo discussão kona-ba membro sira ba Grupo Nacional à Assembleia Parlamentar da Comunidade dos Países de Língua Portuguesa, no ikusmai procede ba eleição escrutínio secreto, no aprovado.

Sr. Deputado no Sr.^a Deputada sira-ne'ebé halo intervenção maka António Verdial de Sousa (KHUNTO), Saul Salvador H. J Amaral (CNRT), Maria Teresa da Silva Gusmão, Manuel Henrique Noronha, Sancha Margarida Tilman (PD), Lúcia Taeki (CNRT), Cristina Yuri Rebelo dos S. Costa (FRETILIN), Olinda Guterres (KHUNTO), Marcos Xavier (CNRT), Dário Madeira, José da Cruz (FRETILIN), Gabriel Soares (CNRT), Helena Martins Belo (FRETILIN), Luís Roberto da Silva (KHUNTO), Veneranda E. M. Lemos Martins, Cedélizia Faria dos Santos, Aliança da Conceição Araújo, Domingos Augusto «Deker» no Domingos Augusto (CNRT) António Verdial de Sousa (KHUNTO), no ikusmai resposta husi Vice-Ministro dos Assuntos Parlamentares, Adérito Hugo da Costa..

Sr.^a Presidente taka sessão plenária ne'e iha tuku 1 liu minuto 14 lokraik.

Sr.^a **Presidente** (Maria Fernanda Lay): — Srs. Deputados, o Vice-Ministro dos Assuntos Parlamentares hein atu ha'u convida, ha'u dehan: «Lae, Ita-Boot nia fatin iha ona, Ita-Boot maka ausente por razões técnicas, ne'ebe Ita-Boot mai tuur kedas.».

Segundo, ha'u atu husu ba Srs. Deputados, sé mak hakarak atu halo intervenção, foti kedas iha início, selae ita la'ó bá, atu taka mak balu foti liman, está bem? Ne'e para ha'u labele injusta neste aspeto. Halo favor regista, se secunda *it's ok*, ne'e para ita poupa tempo.

Muitíssimo obrigado ba atenção.

Tanba iha quórum funcionamento, eu não sei qual é o quórum que nós temos? Ita iha quórum deliberativo, hodi nune'e...Onde está a agenda?

Ha'u husu desculpa, ha'u atu hakarak hahú ona, mas agenda foin mak atualiza, ne'ebe ita hein uitoan para depois ha'u bele haruka fahe mós ba Ita-Boot sira.

Obrigado.

Sr. Vice-Ministro dos Assuntos Parlamentares, caros colegas Deputados, muito bom dia.

Horas hatudu tuku 9 liu minuto 25 dadeer.

Ita ba agenda ohin nian, Agenda n.º 7/VI (1ª), Reunião plenária de terça-feira, 11 de julho de 2023 atualizada. Ha'u husu para haree ida atualizada, ida la'ós, hasai sees tiha.

Primeiro, Período de Antes da Ordem do Dia, ita iha agenda:

1. Anúncio da composição da mesa da Comissão de Assuntos Constitucionais e Justiça;
2. Anúncio dos membros da delegação do Parlamento Nacional à União Interparlamentar e Assembleia Parlamentar Asiática;
3. Voto de pesar pelo falecimento de José João da Conceição Gonçalves Mattoso;
4. Declaração política da Bancada Parlamentar KHUNTO;
5. Intervenções diversas dos Senhores Deputados;
6. Intervenção do Senhor Vice-Ministro dos Assuntos Parlamentares sobre as questões suscitadas pelos Senhores Deputados.

Iha Período da Ordem do Dia: ita iha Eleição dos membros do Grupo Nacional à Assembleia Parlamentar da Comunidade dos Países de Língua Portuguesa.

Ha'u husu ba Sr.^a Secretária, ita ba agenda número 1, que é anúncio da composição da mesa da Comissão de Assuntos Constitucionais e Justiça.

Sr.^a **Secretária da Mesa** (Virgínia Ana Belo): — Obrigada, Sr.^a Presidente.

Bom dia ba ita hotu.

«Composição da mesa da Comissão de Assuntos Constitucionais e Justiça: Presidente da Comissão, Deputado Patrocínio Fernandes dos Reis; Vice-Presidente, António Verdial de Sousa; Secretário, Deputado Albino da Silva.».

Obrigada, Sr.^a Presidente.

Sr.^a **Presidente**: — Tuirmai, número 2 que é anúncio dos membros da delegação do Parlamento Nacional à União Interparlamentar e Assembleia Parlamentar Asiático.

Sr.^a **Secretária da Mesa** (Virgínia Ana Belo): — «Excelentíssima, Sr.^a Presidente do Parlamento Nacional, Deputada Maria Fernanda Lay.

Excelência,

Pelo presente ofício, temos a honra de remeter em anexo as listas dos Deputados da Bancada Parlamentar de FRETILIN que irão integrar Grupo Nacional à União Interparlamentar.

A lista dos Deputados que integram o grupo:

1. Deputado Aniceto Longuinhos Guterres Lopes, efetivo;
2. Deputada Maria Angélica Rangel da Cruz dos Reis, efetivo;
3. Deputada Maria Angelina Sarmiento, suplente;
4. Deputada Maria Anabela Sávio, suplente.

Díli, 11 de julho de 2023,

Bancada Parlamentar de FRETILIN

Aniceto Longuinhos Guterres Lopes, Presidente da Bancada.».

«Excelentíssima, Sr.^a Presidente do Parlamento Nacional, ilustre Deputada Maria Fernanda Lay.

Assunto: Apresentação naran membros ba União Interparlamentar.

Excelência, haktuir ba assunto iha carta ne'e, Bancada CNRT hakarak apresenta naran membros da União Interparlamentar ba Sr.^a Presidente Parlamento Nacional hodi preenche serbisu Grupo Parlamentar de Amizade.

Tuirmai Deputado na'in-haat nu'udar membro efetivo no suplente na'in-haat, mak hanessan:

1. Deputada Veneranda Eurico Marques Lemos Martins, efetivo;
2. Deputado Saul Salvador Amaral, efetivo,
3. Deputada Maria Teresa da Silva Gusmão, efetivo;
4. Deputada Carminda Carlota, efetivo;
5. Deputada Lúcia Taeki, suplente;
6. Deputado Anacleto Freitas, suplente;

7. Deputado Gabriel Soares, suplente; e

8. Deputado Óscar de Araújo, suplente.

Mak ne'e de'it, ba atençaõ no colaboraçãõ di'ak, la haluha hato'o obrigado wa'in.

Díli, 4 de julho de 2023,

Presidente da Bancada do CNRT, Duarte Nunes.».

«A lista dos Deputados que integram o Grupo Nacional da *Association of Southeast Asian Nation Union* da Bancada de FRETILIN:

1. Deputado Antoninho Bianco, efetivo;

2. Deputada Lídia Norberta dos Santos Martins, efetivo;

3. Deputada Cristina Yuri Rebelo dos Santos, suplente;

4. Deputado António Douzel Sarmiento Lima, suplente.

Díli, 10 de julho de 2023,

Bancada Parlamentar da FRETILIN,

Aniceto Longuinhos Guterres Lopes, Presidente da Bancada.».

«Apresentaçãõ naran membro *Asian Parliamentary Assembly* - APA.

Excelência,

Hatudu ba assunto carta ne'e, Bancada CNRT hakarak apresenta naran membro APA ba Sr.^a Presidente Parlamento Nacional hodi preenche serbisu Grupo Parlamentar de Amizade. Naran mak tuirmai ne'e:

1. Deputada Maria Gorumali Barreto, efetivo;

2. Deputado Virgílio Pereira, efetivo;

3. Deputado Armando dos Santos Lopes, suplente.

Mak ne'e de'it, ba atençaõ no colaboraçãõ di'ak hato'o obrigado wa'in.

Díli, 4 de julho de 2023,

Presidente da Bancada do CNRT, Duarte Nunes.».

Obrigada.

Sr.^a **Presidente:** — Ha'u husu desculpa ba Ita-Boot sira-nia paciência, tanba tuir loloos DIPLEN (Divisão de Apoio ao Plenário) fó mai lista ida de'it, ba bancada ida-ne'e, ba assunto ida ne'ebé, mas infelizmente ita tem que hadi'a, e ha'u espera, para bele facilita a vida da minha Secretária, senão *kasian*, nia tem que bá buka. Sorte ha'u iha Vice di'ak ida, Vice rua be bele ajuda ha'u. Ne'ebe, ha'u espera katak iha futuro ita hadi'a buat sira-ne'e para simplifica e lailais liu.

Tuirmai, número 3, que é voto de pesar pelo falecimento de José João da Conceição Gonçalves Mattoso.

Halo favor, Sr.^a Secretária.

Sr.^a **Secretária da Mesa** (Virgínia Ana Belo): — «Voto n.º 1/2023 - De pesar pelo falecimento do Professor José Mattoso.

Faleceu, no passado dia 8 de julho, o Professor José Mattoso, reputado historiador português, que se especializou em história medieval com um legado de vários dezenas de livros publicados.

Nascido em 22 de janeiro de 1933, José João da Conceição Gonçalves Mattoso - o seu nome completo - dedicou uma parte do seu trabalho à história de Timor-leste, tendo contribuído, entre 2000 e 2005, para a recuperação dos arquivos do país, em particular do movimento de resistência ao invasor indonésio. Produziu, neste domínio, o livro, que foi muito apreciado, intitulado “*A Dignidade: Konis Santana e a resistência timorense*”.

Bem conhecido do povo timorense, foi um homem intelectualmente brilhante e incansável pesquisador de factos históricos. Nutriu um especial carinho por Timor-Leste, que visitou várias vezes, o seu nome não será jamais esquecido. A sua memória ficará gravada nos corações de todos nós!

Assim, o Parlamento Nacional, reunido em sessão plenária, expressa o seu profundo pesar pelo falecimento do Professor José Mattoso, endereçando sentidas condolências à sua família e amigos enlutados.

Parlamento Nacional, 11 de julho de 2023.

Os Deputados e Deputadas proponentes, António da Conceição e Duarte Nunes.».

Obrigada, Sr.^a Presidente.

Sr.^a **Presidente**: — Obrigada, Sr.^a Secretária.

Molok ha'u fó ba Deputados proponentes ba voto de pesar, iha pedido ponto de ordem.

Sr. Deputado Aniceto Guterres.

Sr. **Aniceto Longuinhos Guterres Lopes** (FRETILIN): — Obrigado, Sr.^a Presidente.

Distintos Deputados, atu corrige lailais de'it ida ohin, APA. APA ne'e ba Ásia nian, interparlamentar Ásia nian, ba ASEAN nian ne'e AIPA. Atu corrige ida-ne'e.

Seluk tan, informação, Sr.^a Presidente, tanba ha'u kaer ba agenda ida horisehik nian ne'ebé Mesa anuncia, iha mós grupo nacional ba UIP ho CPLP nian. Ami iha alteração ida, ofício mak foin haruka daudauk, parece tama ona iha Mesa, ba União Interparlamentar nian, iha substituto Deputado Florentino «Sinarai» ba fali distinta Deputada Maria Angelina Sarmiento. Ho consideração, tanba ha'u

hatene União Interparlamentar ne'e agora nia composição ne'e tem que iha mós jovem parlamentar ne'ebé tem que compõe iha-ne'ebá, ho razão ida-ne'e mak ami apresenta feto ida tan, Sr.^a Deputada Angelina Sarmiento, hanesan substituto husi parte FRETILIN nian.

Obrigado.

Sr.^a **Presidente**: — Muiíssimo obrigado, Sr. Deputado Aniceto.

Simplesmente iha confusão uitoan iha naran ne'ebé hato'o mai Mesa, mas ida-ne'e ita bele depois acerta halo didi'ak, tanba balu tau *Asian*, la'ós ASEAN, maibé iha AIPA. E depois APA iha correções, e ha'u espera katak ba futuro, bainhira hakarak iha composição ne'e, tanba ita proporcional, negociações fazem fora do Plenário, para ita mai ne'e: «Oh, ida-ne'e mak tama!». Atu acomoda ida-ne'e, baibain ita halo kedas. Ne'ebe, desde uluk iha composições proporcionalidade maibé em negociações entre as bancadas, ita iha representatividade. Ne'ebe, ha'u espera katak depois estas negociações fazem-se fora do Plenário, to'o ona iha-ne'e ita decide de'it ona ba saida que hato'o mai Mesa, está bem? Porque selae ita mai corrige iha-ne'e, halo ami mós orsida... Mas, ha'u hanoin, ho erros ne'ebé ita halo, ita bele corrige depois da decisão, tanba naran ne'e mak sala, maibé composição ba esses grupos já está certo. Ne'ebe, ohin ho correção husi Bancada da FRETILIN, ami considera ona. E depois de ida-ne'e, se bainhira iha desentendimento ruma atu halo parte ida-ne'ebé, naran tem que tuir, ita bele corrige depois do Plenário, está bem?

Tuirmai, ha'u loke, fó ba proponente ba voto de pesar, Sr. Deputado António da Conceição ho Sr. Deputado Duarte Nunes. Ida-ne'ebé mak hakarak intervém, halo favor proponentes! Faz favor.

Sr. **António da Conceição «Kaloan»** (PD): — Muito obrigado, Sr.^a Presidente.

Bom dia, Sr.^a Presidente e a composição da Mesa, bom dia e bem-vindo ba Sr. Vice-Ministro Assuntos Parlamentares, bom dia, todos os Presidentes das Bancadas Parlamentares e Senhoras e Senhores Deputados.

Hanesan hakerek iha voto de pesar ne'e descreve uitoan kona-ba Professor Mattoso, Professor Mattoso ne'e nia especialidade de área mak agora daudauk hakerek tiha hotu ona ne'e, maibé ha'u ko'alia uitoan de'it kona-ba ninia proximidade ba Timor, e, ninia proximidade ne'e mak lori ita atu haree nia hanesan ema ida-ne'ebé ita mós bele presta homenagem.

Professor Mattoso ne'e colega mós ho Dom Basílio, matebian, e mós nia, depois de referendo ne'e, mai mós contribui maka'as tebes ba setor da educação iha Timor. Iha parte da formação, nia mós professor ida iha Seminário Maior Fatumeta ninian, ne'ebé ninia atenção ho dedicação sira-ne'e lori mós professor balu, ne'ebé ninia colega sira, lori mai atu iha tempo ida-ne'ebé depois de referendo ita hahú buat hotu-hotu, sira mós ajuda ita iha-ne'e iha parte da educação tanba proximidade ida-ne'ebé sira iha ba Timor, e mós sentimento humano ne'ebé sira hadomi duni Timor ne'e nian hanesan país

ida-ne'ebé mós uluk halo parte ba Portugal como província ultramarina. Tanba ida-ne'e, ha'u hanoin, ita sente lakon ema ida-ne'ebé iha duni compaixão ba Timor. Nia hadomi tebes Timor, hadomi timoroan sira, iha fatin ne'ebé de'it mak nia hasoru, nia sempre hasé.

Ha'u, dala ida ho colega Deputado sira halo viagem ida bá Portugal, por coincidência hasoru malu de'it iha fatin público ida e nia sei buka atu hasoru para cumprimenta e dehan: «Ita timoroan, ita mak Ministro da Educação». Ha'u orgulho tebes tanba iha ema ida-ne'ebé barak tebes, figura ida-ne'e bele consegue identifica mós timoroan sira. Tanba ne'e mak, ha'u hanoin, iha fatin tebes ba ita para hatudu ita-nia solidariedade ba Professor Mattoso ne'ebé, para além das atividades intelectuais, académicos, ne'ebé nia halo ba ita-nia história da luta, humanamente iha relação pessoal ida emocionalmente forte ba ita timoroan sira hotu. Tanba ne'e ha'u propõe atu ita hotu-hotu fó, la'ós de'it ita-nia apoio ba nia família, maibé mós presta homenagem ida ba dedicação tomak ne'ebé nia halo ona ba ita, timoroan sira.

Muito obrigado, Sr.^a Presidente.

Sr.^a **Presidente**: — Sr. Duarte Nunes também quer fazer intervenção? Ou já chega?

Se já chega, ha'u loke ba debate se iha buat ruma que tem que tau, bá corrige nia texto.

Halo favor, Srs. Deputados.

A Sr.^a Deputada Olinda hakarak intervém ka ponto de ordem? Tanba intervém ho ponto de ordem la hanesan.

Está bem, faz favor.

Sr.^a **Olinda Guterres** (KHUNTO): — Sr.^a Presidente, ha'u hanesan uluk ne'e, agora mós continua nafatin ida-ne'e. História ne'ebé Sr. matebian ne'e nian mak Sr. António da Conceição ko'alia ona ne'e, ema iha rai-li'ur ne'e ita iha-ne'e ladún hatene hotu, Sr.^a Presidente.

Obrigada.

Sr.^a **Presidente**: — Obrigado.

Mas ha'u tem que loke tanba selae ita bá debate tiha ponto de ordem ko'alia fali nune'e, ne'e labele! Ne'ebe regra mak ne'e, ha'u agradece ba correções, maibé ha'u tem que fó oportunidade. Se la iha intervenções atu hadi'a texto, ita bele tama ba votação?

Está bem!

Deputado sira aceita ba votação.

Então, prepara ba vota, Srs. Deputados, tanba matebian realmente merece ita-nia voto de pesar ba nia. Ne'ebe quem vota a favor, contra e abstenção?

Deputado sira hala'o votação ordinária.

Obrigado.

Três Deputados estão ausentes, Srs. Deputados, ita iha 62.

Hato'o ona ba votação no hetan aprovação ho unanimidade husi Deputado sira-ne'ebé presente, hamutuk 62.

Ba agenda tuirmai, declaração política da Bancada Parlamentar do KHUNTO, halo favor.

Sr. António Verdial de Sousa (KHUNTO): — Muito obrigado, Sr.^a Presidente.

Bom dia, Sr.^a Presidente, componentes Mesa. Bom dia Sr. Vice-Ministro ne'ebé trata assunto parlamentar, agradece tebetebes Ita-Boot bele marca presença ohin lora atu nune'e bele rona atan ha'u-nia lian husi bancada KHUNTO, nune'e tatoli mós ha'u lian ne'e ba iha Excelência Primeiro-Ministro IX Governo Constitucional.

Sr.^a Presidente do Parlamento Nacional, Vice-Presidentes, componentes da Mesa Parlamento Nacional, Sr. Vice-Ministro ne'ebé trata assunto parlamentar, ba maluk distintas Deputadas no Deputados, maluk jornalista sira, povo doben Timor-Leste no rona-na'in ne'ebé sintoniza hela atan ha'u lian husi canal Rádio Parlamento Nacional, ha'u-nia respeito no saudações fraternais.

Excelências distintas Deputadas no Deputados, tuir história, administração rai iha Timor iha problema ne'ebé complexo no susar. Problema ne'e mosu tanba nação ne'ebé mai ukun Timor ho nia lei rai ne'ebé vigora iha nia nação no assunto ida-ne'e ita tem que haree husi:

Ida, biban Portugal ukun Timor 450 anos, desde 1522 to'o 1975, lei ne'ebé sira rai hela mak Carta de Lei n.º 1901, de 19 de maio.

Iha Japão nia ukun, tinan tolu de'it, 1942 a 1945, Japão la rai hela produto lei rai ida.

Iha biban administração Indonésia ukun, tinan 24, hahú husi 7 de dezembro de 1975 to'o 24 outubro de 1999, hala'o lei rai ne'ebé vigora iha Indonésia, maka: *Undang-Undang Dasar pasal 33 ayat 3*; *Undang-Undang* n.º 5 tinan 1960 kona-ba Base Lei Agrária; Decreto-Lei n.º 24 de 1997 kona-ba Registru Rai.

Hafoin Timor-Leste hetan reconhecimento husi comunidade internacional iha 20 de maio de 2002, Governo harii entidade ida-ne'ebé hola mahon iha Ministério da Justiça, hanaran Direção Nacional de Terras e Propriedades, língua *bahasa* karik dehan *BPNnya* (*Badan Pertanahan Nasional*)

Timor-Leste, ho nune'e entidade refere iha função bodik regista rai no soin ne'ebé book an no la book an iha rai nia leten.

Excelência distintas Deputadas no Deputados, iha-ne'e atan ha'u atu hato'o situação jurídica liga ba rai iha Timor-Leste mak hanesan:

1. Resolução Nações Unidas 1272, de 25 de outubro de 1999.

2. Hahú 24 de outubro 1999 to'o 20 de maio de 2002, e UNTAET entrega poder ba Estado Timor-Leste.

Iha biban Governo UNTAET ukun Timor-Leste, entidade ne'ebé iha função hodi trata assunto rai mak *National Directorate for Land and Property*.

Momento ne'ebá UNTAET mós hasai regras mak hanesan tuirmai: Regulamento UNTAET n.º 1 27 de novembro de 1999; Regulamento UNTAET n.º 27 ano 2000.

Tama ba ita-nia Constituição da República Democrática de Timor-Leste ita hotu iha direito pleno, artigo 54.º no 141.º, no to'o ohin loron leis no decreto-leis ne'ebé existe mak hanesan: Lei n.º 1/2003, de 10 de março; Decreto-Lei n.º 19/2004, de 17 de dezembro 2004; Lei n.º 12/2005; Decreto-Lei n.º 6/2011 no Lei Rai ho nia n.º 13/2017, de 5 de junho de 2017 kona-ba Regime especial para a Definição da titularidade de bens imóveis, no, ikusliu maka Decreto-Lei n.º 14/2022, ne'e aprova O código de registo predial, de 6 de abril de 2022.

Excelências, distintas Deputadas no Deputados, hanesan Deputado, husi Uma Democracia atan ha'u hakarak hato'o hanoin ne'ebé construtivo ba IX Governo Constitucional, nakait ho *konferensi pers Na'i-Ulun Justiça* iha Governo anterior, ne'ebé dehan katak iha tempo administração portuguesa no tempo administração indonésia la iha Certificado Na'in ba Rai, (Direito Costumeiro no *Hak Milik, Hak Guna Bangunan, Hak Pakai no Hak Pengelolaan*), ne'ebé hakerek momoos, descreve momoos iha artigo 3.º husi lei n.º 13/2017 ne'e imi altera tiha ona ka?

Segundo, Decreto-Lei n.º 65/2022, kona-ba Informação Cadastro Predial, ne'e tama iha vigor dia 1 de novembro de 2022 no dia 27 ka 28 de novembro 2022, bele atribui ona direito perfeito ba UKL ka?

Conteúdo SNC ne'e atu fahe certificado ba ema timoroan hotu, la'ós de'it ba UKL ne'ebé maioria iha rai ema seluk ninian, inclui rai Estado, ne'ebé tuir loloos, liuhosi conteúdo esporádica.

Atribuição de título la precisa liuhusi publicação ka? Modelo certificado bele garante duplicação ka falsificação iha futuro? Marcação usa besi 32 milímetros no tesi badak ba 40 cêntimos, ne'e garante delimitação baliza ka? Certificado sira-ne'e iha ka lae *peta dasar* ka mapeamento base?

Ba maluk makaer-ukun iha Ministério da Justiça, tuir atan ha'u-nia observação, Ita-Boot sira ema jurista, maibé la'ós legalista, satán *praktista*. Tanba ne'e, caso ida-ne'e atan ha'u, hanesan Deputado, considera no fó solução ba IX Governo Constitucional, precisa estuda didi'ak no hatuur ho

loloos orçamento iha fatin ne'ebé estratégico atu nune'e iha futuro la bele halo mal gasto orçamento no ikusmai certificado sira-ne'ebé Ita-Boot sira produz sei *batal demi hukum*.

Hanesan Deputado ne'ebé iha conhecimento natoon iha área *Land Law and Community Information, Land Administration, Land Reform, Land Use, Land Registration* no *Land Dispute* cadastral, ha'u husu ba júnior sira, favor la bele hakarak de'it mak hetan confiança política husi instrumento político sira, maibé se bele, Ita-Boot sira mós tem que halo esforço hodi hakle'an no compreende lei ne'e rasik. Iha perspectiva técnica, atan ha'u fó exemplo simples: hola besi boot milímetros 32, tesi halo badak ba 40 centímetros hodi bá tau iha marcação ne'e teoria husi técnico ne'ebé hola responsabilidade iha demarcação cadastral husi karketu ida ba karketu seluk no husi área ida ba área seluk.

Excelências, distintas Deputadas no Deputados, assunto técnico ne'ebé ha'u temi, ninia tratamento tem que iha corredor dimensional. Dimensional saida? Mak economia, social, política, cultural, defesa no segurança. Buat sira-ne'e hotu precisa iha formação contínua no sustentável. Sasán sira-ne'e precisa no exige liderança ida-ne'ebé equitativo, eficaz, produtivo, criativo, ne'ebé iha visão no missão ida-ne'ebé tem que claro. Tanba saida mak ha'u tem que ko'alia? Tanba povo em geral, empresário nacional no internacional sira no ita hotu hein segurança jurídica ba rai ketan ida-ne'ebé ita hela bá. Precisa ita hotu hatene katak rico-soin único ne'ebé povo ne'e iha mak rai ketan ida-ne'ebé nia usa hodi hela bá no fatin ne'ebé nia halo to'os, natar, hakiak animal no seluk-seluk tan.

Ikusliu, hanesan Deputado, ha'u oferece solução ba IX Governo Constitucional:

1. Secretaria de Estado de Terras e Propriedades, di'ak liu maka tem que sai instituição ida-ne'ebé autónoma ho capacidade administrativa no financeira. Tuir loloos Secretaria refere trata assunto hanesan ha'u temi, la bele hela ka hamahan an ka hola mahan iha Ministério da Justiça. Dala ida tan, hanesan Deputado, ha'u husu atu instituição ne'e tem que autónoma ho capacidade administrativa no financeira.

2. Formação ba área *Land Law, Land Management, Land Reform, Land Use, Land Registration* no *Land Dispute*, nune'e mós técnico informática precisa tebes, tem que tau em marcha. Tanba saida? Tanba, depois ha'u tama tiha Deputado iha IV Legislatura no cinco anos iha V Legislatura ha'u seidauk haree Governo fó formação ba área técnica hirak ne'ebé ha'u temi.

3. Usa recursos ne'ebé iha tanba ita rasik mak hasai osan Estado hodi forma no capacita sira liuhosi curso lubun iha tempo naruk no serviço kleur ona iha fatin ne'ebá. Ho haraik an, hanesan Deputado, ha'u husu atu la bele hasai sira tuir ita-nia gosto.

Tenho dito.

Rohan ba ne'e declaração política Bancada KHUNTO ohin loron, e Sr.^a Presidente, Sr. Vice-Ministro ne'ebé trata assunto parlamentar, hanesan Deputado ne'ebé iha experiência iha área ne'e, ha'u sei ko'alia, ko'alia beibeik ba área ida-ne'e, bainhira ha'u sei iha Uma-Fukun, Parlamento.

Obrigado.

Sr.^a **Presidente**: — Tuirmai, tama ba intervenção dos Srs. Deputados.

Hahú husi Sr. Deputado Saul Amaral.

Sr. **Saul Salvador H. J Amaral** (CNRT): — Obrigado.

Bom dia ba Presidente, composição da Mesa, bem-vindo ba Vice-Ministro Assuntos Parlamentares, distintas Deputadas e distintos Deputados, mória no rona-na'in sira hotu.

Hanesan representante povo iha Parlamento Nacional husi bancada Governo, atu fó apreciação de'it ba IX Governo, ne'ebé halo ona esforço maka'as hodi resolve calamidade ne'ebé acontece iha semana kotuk, ita hotu-hotu acompanha, liuliu ba município hitu. Ho ida-ne'e mak ha'u fó apreciação ba IX Governo ne'ebé lidera husi S. Ex.^a Primeiro-Ministro, Maun Boot Kay Rala Xanana Gusmão, ne'ebé fó ona orientação ba Ministério Obras Públicas, liuhusi IGE (Instituto de Gestão dos Equipamentos), buka ona soluções no mós orienta Secretário Estado Proteção Civil iha loron rua foin lailais, segunda horisehik no mós sábado, tun kedas iha terreno hodi haree população sira-ne'ebé afetado, evacua mai iha posto Zumalai. População sira-ne'e hamutuk 454, husi ne'e 57 mak lakon total sira-nia hela-fatin. Ida-ne'e esforço ne'ebé di'ak. Maski IX Governo seidak iha *full power* ka pleno poder, maibé consegue esforço *luar biasa*. Ha'u fiar katak IX Governo maihusi povo e atu atende povo. Ho ida-ne'e, hanesan representante povo, aprecia tebes.

Ida-ne'e mak ha'u bele hato'o.

Obrigado ba Presidente.

Sr.^a **Presidente**: — Ha'u taka ona inscrição ba intervenções tanba, hanesan ohin ha'u hatete, tama mai *langsung* foti liman para ita hatene na'in-hira. Ne'ebe, ha'u taka ona. Iha na'in hira mak iha-ne'e e ida-ne'e mak ita halo hotu.

Tuirmai, Sr.^a Deputada Maria Teresa.

Sr.^a **Maria Teresa da Silva Gusmão** (PD): — Obrigada, Sr.^a Presidente.

Ha'u-nia bom dia ba Sr.^a Presidente no composição da Mesa, bom dia no bem-vindo ba Vice-Ministro Assunto Parlamentar, Chefe Bancadas, distintas Deputadas, distintos Deputados no rona-na'in sira hotu.

Iha intervenção ohin ha'u hakarak foti assunto atual no fenomenal, kona-ba Governo foun troca maluk sira-ne'ebé serbisu iha instituição Governo nu'udar recrutamento político, casual no funcionário público, cargo chefia.

Quase semana hirak-ne'e *média social* rame ho *isu* hasai ou troca maluk sira iha quase Ministério hotu. Decisão ida-ne'e fó percepção, merece duni atu troca ka ne'e nu'udar decisão justiça nu'udar timoroan, Timor ida ba ema hotu, liuliu recrutamento casuais ne'ebé serbisu tinan 10 resin to'o ohin loron identidade la claro. Maibé consequência real mak hamosu desemprego boot, tanba Governo anterior halo recrutamento ho quantidades demais ho intenção hamenos desemprego, maibé Governo foun hakotu contrato hodi hamosu nafatin desemprego.

Perguntas: Ne'e normal hela ka injustiça?; Sé loos mak iha direito ba Timor no sé loos mak iha direito bolu timoroan?

La'ós ona buat foun, Governo ida sa'e lori nia ema ho nia política rasik no Governo seluk sa'e fali hatún ema seluk tau fali nia emar. Ne'e competição ne'ebé la saudável, fenómeno ida-ne'ebé nu'udar realidade no ita la nega.

Perguntas: Ita bele halo mudança ka lae? Oinsá? Iha parte ne'ebé? Bainhira no sé mak atu hahú?

Loos duni katak atu kaer ukun nu'udar Nação ne'ebé adota sistema república democrática, considera partido político nu'udar meio ida hodi halibur militantes, hodi garante confiança atu ukun liuhusi convence ho programa, promessas oin-oin, hodi garante votos confiança atu manán iha eleição hodi kaer ukun. Maibé, keta haluha! Partido nu'udar meio ida atu hetan confiança no maioria povo atu gere rico-soin no povo nia moris di'ak.

Partido ida tun, partido ida seluk sa'e ukun fali, conforme povo nia decisão, maibé hotu-hotu mesak timoroan de'it. Nune'e, haree husi perspectiva política, decisão hapára recrutamento político ne'e normal hela, maibé recrutamento casual, liuliu sira-ne'ebé serbisu tinan lima ba leten, recrutamento por mérito, cargo chefia potencial, Governo foun bele tetu ho espírito «Hamutuk ita bele halo mudança».

Claro que la fácil ba IX Governo Constitucional atu halo mudança radical tanba IX Governo mós tem que cumpre compromisso, promessas políticas, ne'ebé halo ho nia militantes hodi garante ona confiança de voto hodi kaer ona ukun. Maibé ita hotu ne'ebé daudaun ne'e assume hela responsabilidade iha Parlamento Nacional no Governo, bele hanaran an segundo geração transformadora, geração continuadora, ne'ebé povo, liuliu jovem sira, tau esperança atu hahú halo mudança.

Tanba ne'e husu ba IX Governo atu, ho fuan boot no vontade boot, halo reforma administrativa, burocracia no sistema recrutamento, liuliu recrutamento político no casuais, ne'ebé tuir informação barak demais, ne'ebé la *efisien* ho necessidade, hamosu de'it *preseden*, satisfaz de'it militantes, liuliu jovem sira, hodi hakiak de'it jovem dependência, la produtivo, criativo no inovativo, oinsá ita bele mehi jovem mak futuro ba Nação.

IX Governo tem que assume dever no responsabilidade moral no humana bainhira hapára ona recrutamento casuais no político no povo hotu-hotu nia continuação moris, tanba sira mós iha família. Maski sira la'ós militantes vota ba partido vencedor, tanba lei garante livre hili partido político, maibé sira timoroan, hun ida, abut ida, povo ida no Timor-Leste ida de'it.

Tuir ha'u-nia perspectiva, solução balanço liu mak cria campo serbisu iha setor hotu-hotu atu garante ema hotu-hotu hetan oportunidade atu serbisu ho digno no moris ho digno mós.

Encoraja IX Governo hahú neineik, maibé beibeik maski todan, halo mudança ho espírito «Timor mak ita hotu, ita hotu mak Timor». Ho nune'e de'it ita iha biban kore daudauk corrente ódio vingança, conflito, vítima *psikologis*, *psikis*, partidarismo, grupismo, familiarismo no ismo-ismo seluk, liuliu ba ita-nia jovem sira nu'udar futuro Nação.

Se ita la hahú ohin, no agora...

Sr.^a **Presidente**: — Conclui, Sr.^a Deputada.

Sr. **Maria Teresa da Silva Gusmão** (PD): — Sim, la to'o minuto ida.

Se ita la hahú ohin no agora halo política de ternura, ita husik de'it saida no hakerek lerek história saida atu geração tuirmai conta tuir? Sira sei orgulho ho saida mak ita husik hela, tempo la bá kotuk. Se nune'e hela de'it, ita la garante paz, estabilidade ba ita-nia geração tuirmai.

Ikusmai, ha'u atu dehan de'it: «Saida mak ita kuda, ida-ne'e mak ita sei ku'u». Espera ita hahú ona kuda fini ne'ebé di'ak nune'e colheita mós resultado ne'ebé di'ak.

Ita la iha ona buat ida. História hatuur ona, iha geração sei mai mudança bele di'ak ou bele la di'ak, maibé ita hotu iha esperança boot atu hahú agora. Ita la halo julgamento sé mak sala, sé mak hahú, se mak hahú uluk, maibé reconhece ida-ne'e mak ita-nia problema no ita-nia realidade. Ita hotu hamutuk sei bele.

Obrigada, Sr.^a Presidente.

Sr.^a **Presidente**: — *Good point*, Sr.^a Deputada Teresa. Maibé loron seluk bele tama ba declaração política ne'ebé tem 10 minutos. Furak tebes, «ita mak kuda, ita mak sei ku'u». *Good point!* Tuirmai, Sr. Deputado Manuel Henrique.

Sr. **Manuel Henrique Noronha** (PD): — Obrigado ba oportunidade.

Sr.^a Presidente Parlamento ho composição da Mesa, Vice-Ministro Assuntos Parlamentares, chefe bancadas, distintas Deputadas e distintos Deputados, mídia, rona-na'in sira hotu no mós observador sira hotu mak ha'u respeita.

Primeiro, agradece ba Na'i Maromak tanba ho kbiit no força tomak bele halibur ita hamutuk iha fatin ida-ne'e hodi ko'alia kona-ba Nação no povo nia vida tomak ba futuro.

Segundo, agradece mós ba ukun-na'in iha IX Governo, ho posse foin mak semana ida resin hasoru situação ne'ebé boot, maibé consegue atende duni necessidade povo ninian. Mesmo urgente no uitoan, maibé bele atende povo nia necessidade.

Terceiro, agradece mós ba Governo local, liuliu município, ne'ebé hasoru problema inundação, bele resolve hamutuk ho Governo nacional hodi atende duni necessidade povo ninian, liuliu Município Manufahi ne'ebé ha'u direta bá iha-ne'ebá, ho situação lubuk ida, maibé Governo Local bele iha ligação ne'ebé di'ak ho companhia balu, hanesan *MG* ho *Star King*, bele facilita situação ne'ebé susar tebes, maibé ita-nia comunidade sira bele hetan acesso ba sira-nia vida tomak.

Ida fali, atu hato'o ba Presidente katak irrigação iha Betano foin daudauk ne'e hasoru problema boot. Irrigação ida-ne'e hahú husi 2021-2022 ne'e hasoru kedas problema, rai-henek taka ba irrigação ida-ne'e fó impacto ba natar ne'ebé iha área Betano, e, ho situação udan no inundação ida-ne'e impacto boot tebes. *Bronjong* taka metin tiha dalan ba bee nian ne'ebé atu fornece bee ba natar, então dificulta comunidade ne'ebé halo natar iha-ne'ebá. Se urgentemente Governo ne'e la bele foti decisão ruma, então tinan ida-ne'e comunidade iha área ne'ebá la bele hetan rendimento ba sira-nia hare.

Tuir fali, atu hato'o mós katak comunidade iha Kolokau, iha Suco Uma Berloik, Posto Alas, tinan-tinan, quando hetan udan boot ona, sira sempre sofre ba inundação. Ne'ebe, husu ba companhia ne'ebé halo manutenção iha-ne'ebá no mós husu ba IX Governo bele tau atenção máximo atu nune'e comunidade ne'ebá labele hetan beibeik afetado husi situação ida-ne'e.

E ha'u sente katak situação ida-ne'e la'ós ba Manufahi de'it, maibé ba Timor laran tomak. Maibé ha'u la to'o município sira-ne'ebá, como ha'u to'o de'it iha área ne'ebé ha'u to'o, então informação atu hato'o ba IX Governo, e bele atende situação ida-ne'e atu nune'e ita-nia comunidade sira bele hasoru moris ne'ebé di'ak ba futuro.

E ha'u atu hatete katak ita mai iha-ne'e ita mai ho esperança no ho objetivo ida. Esperança katak ita hamutuk, ita bele tau hamutuk hanoin ida atu nune'e ho objetivo ida katak ita bele hadi'a, atu ita-nia povo nia moris di'ak ba futuro.

Mak ne'e de'it.

Obrigado.

Sr.^a **Presidente**: — Tuirmai, Sr.^a Deputada Sancha Tilman.

Sr.^a **Sância Florência Paixão Bano** (FRETILIN): — Obrigado barak ba tempo. Uluknanain ha'u-nia respeito ba Presidente Parlamento Nacional. Composição da Mesa...

Iha interrupção husi Mesa.

Ha'u ka la'ós?

Sr.^a **Presidente**: — Não! Sancha Tilman. Hau hanoin, Sr.^a Deputada la'ós Sancha Tilman. É Sância Bano, está certo?

Sr.^a **Sância Florência Paixão Bano** (FRETILIN): — Ha'u mós ohin hi'it liman.

Sr.^a **Presidente**: — Sim, já está aqui!

Sr.^a **Sância Florência Paixão Bano** (FRETILIN): — Então, pronto, desculpa!

Sr.^a **Presidente**: — *Ok!* Halo favor tau *headset* para rona didi'ak. Mas, ha'u hanoin, ha'u-nia pronúncia foi clara. Tau *headset*, por favor!

Obrigado.

Sr.^a **Sancha Margarida Tilman** (PD): — Di'ak, obrigada.

Bom dia ba Sr.^a Presidente Parlamento Nacional, composição Mesa mak ha'u respeita, Vice-Ministro Assuntos Parlamentares, bem-vindo e bom dia ba Ita-Boot, distintos Deputados no rona-na'in sira mak ha'u respeita, bom dia ba ita hotu.

Ha'u iha assunto ida mak atu intervém iha dadeer ida-ne'e, liga ba iha processo pagamento ba idoso sira-ne'ebé tinan ida sira sempre hetan sira-nia pagamento fulan neen dala ida.

Pergunta mak ne'e: será que idoso sira mós sira-nia plano ba sira-nia necessidade ne'e plano ba fulan neen fulan neen mak sira foin hetan sira-nia direito ne'e? Ka sira mós iha direito atubele iha acesso fulan-fulan hanesan mós ita hotu ne'ebé iha-ne'e no mós ba sira seluk ne'ebé iha acesso ba sira-nia direito salário ka ho sira seluk tan cada mês?

Ha'u ko'alia ida-ne'e tanba ita haree kona-ba maluk idoso sira-ne'ebé fulan lima, fulan neen ou selae fulan neen tiha ona seidauk bele iha acesso ba sira-nia processo pagamento ba idoso, sira mate tiha ona iha dalan klaran. Ida-ne'e katak sira-nia direito ne'ebé sira atu hetan bá ne'e lakon tiha de'it. Então, ha'u aproveita husu ba Vice-Ministro dos Assuntos Parlamentares atubele tatoli liafuan ida-ne'e ka informação ida-ne'e ba Ministério Solidariedade atubele iha *kebijakan* ka política ida-ne'ebé di'ak atubele processa maluk idoso sira-nia direito, pelo menos, mensalmente sira bele hetan atu nune'e sira mós bele atende ba sira-nia necessidade.

Por enquanto, mak ida-ne'e de'it.

Obrigada barak ba Mesa.

Sr.^a **Presidente**: — Tuirmai, Sr.^a Deputada Lúcia Taeki.

Sr.^a **Lúcia Taeki** (CNRT): — Di'ak. Obrigada ba tempo.

Bom dia ba Sr.^a Presidente ho componentes da Mesa, colega Deputada e Deputado sira, Sr. Vice-Ministro, bem-vindo mai iha-ne'e. Ne'e la'ós ema foun, ema nanis kedas iha-ne'e.

Ha'u atu ko'alia kona-ba assunto rua de'it: primeiro, ha'u atu ko'alia kona-ba assunto transporte marítimo.

Ita hatene katak Governo hola ró rua, Nakroma e Berlin Ramelau.

Atu ko'alia de'it kona-ba ró Berlin Ramelau, nia la halo operação ba Oe-Cusse ho Ataúro desde outubro de 2022 depois de ró Nakroma halo manutenção e fila husi Indonésia, tanba ita hatene katak depois de ró Nakroma ne'e mai, nia la halo operação. Tanba saida? E nia pára de'it iha tasi laran tanbasá? Ita tem que husu, tanba cada tinan Governo tau osan USD sessenta mil atu halo manutenção ba ró refere.

Ho ida-ne'e passageiros Oe-Cusse ho Ataúro hetan dificuldade tebes. Sorte ita iha companhia ida, Oe-Cusse oan, ne'ebé compra ró *Sukses*, ne'e mak ajuda passageiros Oe-Cusse ho Ataúro. Ho ida-ne'e husu ba IX Governo, liuliu ministério ne'ebé *relevan*, atu haree hela assunto ida-ne'e para labele impede passageiros ne'ebé bá Oe-Cusse ho Ataúro, liuliu negociante sira-ne'ebé buka sira-nia moris.

Tuirmai, ha'u iha tan assunto ida. VIII Governo iha programa ida iha RAEOA naran programa Suco Amasat. Amasat ne'e *bahasa indonésia* karik dehan *indah*, ita-nian karik dehan bonita e bonito, programa ne'e *primadona* ne'ebé implementa iha Oe-Cusse.

Iha fulan janeiro 2023, Secretário Administração Regional recruta hela, tanba ita hatene katak Oe-Cusse iha 18 sucos, sira recruta ema husi 18 sucos. Sira hatene atu recruta de'it, maibé to'ó ohin loron, fulan hitu ona, ema la hetan nia direito. Sira halo ona sira-nia dever, maibé sira-nia direito sira la hetan, tanbasá? Se ita hakarak *rekrut* de'it, mas ita la selu ema, ne'e nu'usá? Ita de'it fulan ida ita la simu, ita hakilar ona, nu'usá ho ema sira-ne'ebé fulan hitu kedas?

Inclui programa recrutamento ida naran APS. APS ne'e dehan hanesan ne'e: «Ami Pronto Serbisu», mas lae, *Aku Perlu Suaramu*. Depois sira *perlu* tiha ema nia *suara*, soe de'it. Ne'e tanbasá? Husu to'ok, liuliu Sr. Vice-Ministro atu contacto ho Presidente Autoridade ne'ebé sei iha, seidauk troca, husu to'ok tanbasá. Ita precisa ema de'it, mas ita la valoriza, ne'e mós la di'ak ida. Ita hakarak ema serbí de'it ita, maibé ita la hanoin sira-nia *keperluan* loroloron.

Ida-ne'e mak ha'u fó-hanoin e ha'u fó-hatene.

Obrigada.

Sr.^a **Presidente**: — Tuirmai, Sr.^a Deputada Cristina Rebelo.

Sr.^a **Cristina Yuri Rebelo dos S. Costa** (FRETILIN): — Obrigada e bom dia ba Presidente, ba composição da Mesa.

Bem-vindo ba Vice-Ministro dos Assuntos Parlamentares ne'ebé ohin marca presença iha-ne'e, ba distinto Deputado no Deputada sira hotu, povo maubere rai ida-ne'e, bom dia ba ita hotu dala ida tan.

Ha'u hakarak atu hato'o questão ida de'it que horisehik ha'u rasik haree através conferência de imprensa, iha porta-voz ida-ne'ebé representa professores contratados husi Ministério Educação husi município Díli, quase 250 pessoas, ne'ebé hato'o sira-nia preocupação tanba seidauk simu sira-nia salário desde abril até a data, quase fulan haat. Ita hotu hatene katak ida-ne'e questão ida que fó impacto ba ita-nia vida social, nu'udar pessoal ida ba uma laran, ba sociedade no mós ba ema tomak.

Haree ba assunto ida-ne'e assunto ida que importante tebetebes ba ita atu resolve, maibé ita mós consciente katak Governo foin mak toma posse iha dia 1 e membros do Governo rasik seidauk mai hato'o sira-nia programa do Governo, mas, tanba Vice-Ministro dos Assuntos Parlamentares tuur ona iha oin, favor ida ita husu para bele encaminha hela no halo hela coordenação ho Ministério de Educação atu haree assunto ida-ne'e ho mais profundo, atu nune'e ita bele hatene problema nia hun ho dikin, hodi nune'e ita bele garante katak assunto ida-ne'e ita trata ho justo hodi assegura katak professor contratado sira-ne'e bele hetan sira-nia salário, tanba sira dedica sira-nia an tomak no investe ho dedicação tomak atu harii no prepara futuro Nação ida-ne'e nian.

Obrigada barak.

Sr.^a **Presidente**: — Tuirmai, Sr.^a Deputada Olinda Guterres.

Sr.^a **Olinda Guterres** (KHUNTO): — Di'ak, bom dia dala ida tan ba Ita-Boot, colegas Deputados.

Bem-vindo Sr. Vice-Ministro, ne'ebe baibain ita tuur hamutuk iha-ne'e, mas horas ne'e daudauk iha fali ami-nia oin, ami contente tebes. Bainhira ami hato'o ami-nia problema, ha'u fiar katak Ita-Boot tem que hato'o, liuliu Olinda ninian.

Deputado balu hamnasa.

Sr.^a Presidente, ha'u diretamente ba Sr. Vice-Ministro, bele ka lae?

Sr. Vice-Ministro, iha semana uluk Ita-Boot la mai, maibé iha-ne'e iha problema ida iha-ne'e mak ha'u hato'o tanba ha'u simu telefone husi Venilale, Suco Uai-Oli. Iha-ne'e ha'u hato'o ona, maibé

to’o ona Ita-Boot ou seidak? Kona-ba estrada Venilale ba Uai-Oli ha’u foti iha-ne’e dala neen. Ita-Boot iha-ne’e haree, dala neen tuituir malu, to’o ikus Obras Públicas haruka duni ema hala’o serbisu halo estrada ne’ebá ho companhia tolu, nove quilómetros divide por três, então companhia ida kaer quilómetro tolu. Ha’u la hatene, to’o agora estrada ne’e hotu ona ka seidak? Loloos hotu iha tinan uluk, maibé sira fó informação mai iha-ne’e dehan katak estrada agora sai aat liután fali. Ne’ebe, ha’u hanoin, husu ba ministério relevante, liuliu ba Ministro Obras públicas, atubele tun kedas ona, ohin ou aban, hodi haree iha-ne’ebá tanba população husi suco Uai-Oli, ha’u-nia suco rasik, agora lori hahán, ai-fuan, mai Venilale atu fa’an mós la bele. Ida-ne’e preocupa tebetebes.

Ida fali, ita iha-ne’e bá Baucau sei di’ak, ne’e buat ida karik ita bele dehan tau valor bom. Agora, husi Baucau bá fali Venilale ita bele tau valor suficiente, maibé iha Venilale atu bá fali Ossu, ne’e ita tau medíocre, Viqueque bá fali Uatulári ne’e ita tau mau. Colega sira-ne’ebé *pernah guru...* Sr. António Conceição hateke mai hamnasa, Ita-Boot mak uluk Ministro be Ita-Boot mak hatene liu, bom, medíocre no suficiente ne’e mai husi ne’ebé. Ne’ebe, ha’u hanoin, husu ba ministério competente, liuliu ba estrada sira la’ós bá Uai-Oli, ha’u-nia suco ne’e de’it, maibé bá em geral, se bele tun kedas ona ba base para bele hala’o tanba ita-nia Primeiro-Ministro dehan katak 120 dias Sr. Primeiro-Ministro hakarak haree buat ruma.

Mais ou menos ida-ne’e de’it mak ha’u hakarak hato’o.

Desculpa, ida tan ohin Sr.^a Deputada husi CNRT nian dehan katak Ró Nakroma, ró ida-ne’e uluk ex-Ministro Transporte e Comunicação lori hala’o la di’ak ona, agora Ita-Boot sira mak ukun, entrega fali ba Ita-Boot sira para hodi haree. Ita labele duun bá malu dehan ida-ne’e la di’ak, ida-ne’ebá la di’ak, agora ida ukun dehan ida-ne’e la di’ak, ida ukun fali dehan ida-ne’e la di’ak. Ne’e ladún di’ak! Mai ita hamutuk hodi hadi’a oinsá mak bele la’o bá di’ak. Ita-nia povo sira iha Oe-Cusse la’ós CNRT nian de’it mak iha-ne’ebá, maibé ami KHUNTO nian mós iha-ne’ebá, no mós FRETILIN nian, partido lima ne’e nian iha hotu ne’ebá. Tanba ida-ne’e mak mai ita serbisu hamutuk, labele duun ba malu dehan katak ida-ne’e ne’e nian, ida-ne’e anterior nian, agora ida-ne’e ne’e nian. Ne’e buat ida ladún di’ak. Hapára tiha buat ida critica malu ne’e, ita hamutuk hadi’a. Sr. Primeiro-Ministro nia hakarak mak dehan ita hadi’a, nia la precisa dehan ita hamutuk ho sira atu halo coligação, maibé ita hamutuk hadi’a. Tanba ne’e mak agora ami tuur iha-ne’e halo daudauk ne’e, la fó mós ami apoia, ne’e para hodi hadi’a Nação ida-ne’e.

Mais ou menos ida-ne’e de’it mak ha’u hato’o.

Obrigada, Sr. Vice-Ministro, favor ida la bele tau iha bolso bá, lori netik Olinda nia liafuan ne’e ba iha leten ne’ebá, hato’o to’ok. Simu ka la simu, hato’o to’ok bá.

Obrigada.

Sr.^a **Presidente**: — Obrigada, Sr.^a Deputada.

Tuirmai, Sr. Deputado Marcos Xavier.

Sr. **Marcos Xavier** (CNRT): — Obrigado, Presidente.

Bom dia, Presidente ho Vice sira hotu, bem-vindo Sr. Vice-Ministro dos Assuntos Parlamentares, colega distinto e distinta Deputado sira hotu, mídia no povo rona-na'in sira.

Iha dadeer kmanek ida-ne'e ha'u iha assunto ida ka rua atu hato'o iha fatin ida-ne'e.

Primeiro, ba Ministro Interior, Secretário de Estado Proteção Civil, ha'u haree, iha fatin ne'ebé uluk destaca segurança civil sira bá, agora segurança civil sira-ne'e dada hotu tiha.

Por exemplo, hanesan iha Areia Branca, iha Cristo Rei, fatin ne'ebé uluk destaca segurança civil iha-ne'ebá para controla movimento comunidade sira iha fatin refere, maibé dada tiha. Então, iha-ne'ebá hamosu mós lixo barak la halimar, soe arbiru de'it. Ne'e duni husu ba Ministro Interior, liuliu ba Secretário de Estado, atu tau atenção ba iha fatin sira-ne'ebé ita-nia turista internacional, turista local sira, bá visita. Fatin sira-ne'e iha Díli ne'e iha rua: ida mak Cristo Rei e ida fali mak São Paulo, maibé agora segurança civil la iha-ne'ebá. Ne'e duni husu ba Vice-Ministro atu fó-hatene netik ba ministério relevante ho Secretário de Estado para funciona fali sasán sira-ne'e.

Tuirmai, iha mós Cristo Rei, casa de banho sira iha-ne'ebá la funciona, bee la iha. Se lokraik ema ba hasai kosar iha-ne'ebá, ema atu bá casa de banho, casa de banho ne'e la iha manutenção. Ha'u la hatene ida-ne'e cabe iha Ministério Interior ka Ministério Turismo?

Horisehik colega barak ko'alia sobre lixo iha Díli laran, lalika iha Díli laran de'it, ita bá iha Areia Branca, comunidade sira fa'an nuu, fa'an batar, nia kulit sira-ne'e soe fali ba iha tasi-ibun. Ha'u hanoin, IX Governo tem que toma atenção ba iha assunto sira hanesan ne'e.

Tuirmai, kona-ba estrada, iha dia 2, 3, 4 udan boot iha Timor laran tomak, liuliu iha costa-sul, estrada kotu, ponte kotu, bee sa'e comunidade sira-nia uma, ita hakilar ba IGE. Maibé, ita haluha tiha katak iha VIII Governo iha mós Ministério Agricultura iha mós equipamentos pesados. Agora, equipamento pesado ne'ebé iha IGE la suficiente karik, ha'u hanoin, Ministério Agricultura ho Ministério das Obras Públicas ko'alia ba malu para suporta tan equipamento hirak ne'e bá iha terreno. Selae ita haree iha Same ne'ebá, equipamento ida de'it, nia atu normaliza, nia bele han semana ida ka semana rua. Iha mós Defesa, iha mós equipamento iha ne'ebá. Iha Força Defesa, sira iha companhia engenharia ne'e mós iha equipamento. Agora, oinsá, mecanismo saida mak Governo bele halo? Ko'alia entre ministério ida ho ministério seluk hodi suporta, se acontece inundação iha fatin seluk,

Agora, normaliza hotu tiha estrada sira, maibé nia continuação la iha. Dalan ne'e loke tiha, população liu tiha ba maibé tem que iha continuação, selae udan boot mai fali IGE tem que bá halo filafali normalização. Ne'e duni, ha'u hanoin, IX Governo nia programa mós seidauk mai, maibé hodi lai programa ne'e mai iha Parlamento, depois mak ita debate, ita aprova no ita haree to'ok prioridade

saida mak Governo ida-ne'e atu halo. Ne'e duni, aproveita Vice-Ministro Assunto Parlamentar, ne'ebé uluk mós hanesan membros Parlamento Nacional, ami-nia lian ne'ebé tatoli bá informa mós ba iha Conselho de Ministros atubele atende. Ha'u hanoin, ida-ne'e.

Ikusliu, estrada ida Maliana. Ha'u iha-ne'e tinan neen ona, ha'u tama primeiro ha'u foti estrada ida Maliana vila laran ne'e, maibé ha'u hein programa IX Governo hodi mai estrada ida-ne'e sei iha ka lae. Se estrada ida-ne'e laiha mak ha'u sei ko'alia maka'as nafatin iha fatin ida-ne'e.

Muito obrigado, Presidente.

Sr.^a **Presidente**: — Obrigado, Sr. Deputado.

Labele Deputado Município, ita círculo nacional ne'ebé haree nível nacional.

Tuirmai, Sr. Deputado Dário Madeira.

Sr. **Dário Madeira** (FRETILIN): — Obrigado.

Bom dia ba Presidente ho membro da Mesa tomak, Excelência Vice-Ministro ne'ebé marca presença iha-ne'e, colega Deputado sira hotu no povo rona-na'in tomak.

Ha'u atu halo ha'u-nia intervenção ne'e, primeiro, ha'u hakarak ko'alia katak IX Governo existe iha 1 de julho bainhira nia simu posse. Hahú iha dia 1 de julho, quando nia simu posse, ita halo festa boot iha Palácio do Presidente da Republica, fó tiha ona competência ba iha IX Governo, hahú prepara nia programa no plano saida de'it atu halo, la di'ak atu hadi'a, ba oin tinan lima tomak nian. Tanba ne'e ha'u declara la concorda ho Deputado sira-nia intervenção sira-ne'ebé horisehik halo, ohin mós halo tan, desacredita IX Governo, la reconhece IX Governo katak IX Governo seidauk iha poder pleno, ninia poder seidauk *full*. Foin declaração iha-ne'e, ha'u la concorda ida-ne'e!

Tuirmai, tanba IX Governo ne'e constitucional, iha nia poder tomak, ha'u hakarak hato'o ba Excelência Vice-ministro katak inundação ne'ebé acontece iha dia 4 e dia 5 ne'e afeta ba comunidade barak. Deputado sira barak ko'alia, fó tiha ona parabéns ba IV Governo tanba halo ona interversão rápido iha município hitu ba desastre sira-ne'ebé acontece, atende ona, maibé iha Viqueque seidauk atende to'ó agora. Ami Viqueque, Posto Lacluta ne'e, ponte ida iha Suco Uma-Tolu kotu. Ne'e única estrada ida-ne'ebé bele fó acesso ba Posto Lacluta. Foin daudauk ne'e rasik ha'u sei confirma ba chefe suco sira iha-ne'ebá, sira dehan katak la iha normalização e, ha'u la inventa ida-ne'e. Sira-ne'ebé ohin declara dehan Município hitu ne'ebé desastre ne'e atende hotu tiha ona ne'e, ne'e declaração falso. Tanba ne'e mak husu ba iha IX Governo, iha possibilidade balu ne'ebé durante ne'e iha hela terreno karik, bele orienta no organiza para bele halo atendimento lailais ba desastre sira-ne'ebé acontece.

Tuirmai, ha'u mós aprecia ba IX Governo, tanba maioria mesak jovem mak ocupa, espírito foun, para bele serviço dia di'ak ba ita-nia povo no ita-nia estado. Jovem barak, oin tuan mós barak,

experiência tuan mós barak iha laran, tanba ne'e precisa atenção didi'ak para bele hadi'a di'ak liután, labele repete, repete, repete sasán sira-ne'ebé ita halo uluk ona.

CNRT la'ós agora mak vencedor ba eleição legislativa, CNRT mós la'ós mak foin primeira vez bá ukun, para buat hotu ba CNRT ne'e hanesan foun, buat hotu ba Maun Boot Primeiro-Ministro ne'e hanesan buat ida foun de'it. Iha experiência barak iha ukun ne'e, tanba ne'e ukun ida agora ho PD ne'e la'ós ukun foun tan, labele halo foun fali ukun ida-ne'e. Ukun ne'e existe tiha ona e agora hadi'a de'it, tem que hadi'a di'ak liután, labele halo fraco liután fali ita-nia ukun para povo bele sente descontente ba beibeik iha ukun-rasik an ne'e

Ida seluk hakarak mós atu ko'alia, povo tomak iha Timor-Leste ne'e precisa desenvolvimento, precisa mós estrada, bee, eletricidade, saúde, educação, povo precisa, hotu-hotu povo precisa. La'ós povo de'it, liderança mós precisa tanba liderança tun ba campanha promete sasán sira-ne'e ba ema. Tanba ne'e, totalmente ha'u la concorda Vice-Ministro Infraestrutura nia declaração atu hapára estrada Baguia ba Laga, Uai-Aka ba Quelicai. La'ós rua ne'e de'it, fatin seluk mós, ha'u la concorda nia declaração ne'e.

Ministro sira, Membro Governo sira-ne'ebé uluk hola ona decisão sala, investiga nia, processa mak nia! La'ós condição ida-ne'ebé atu cria ba comunidade, ita bá trava fali mak ida-ne'e. Ne'e sala! Simu pose declara atu hapára, ó hatene husi ne'ebé? Sala ne'e iha-ne'ebé? Auditoria de'it to'o agora seidauk bele halo. Auditoria barak-barak, processo ba to'o iha ne'ebe? Ita halo auditoria dala ida tan, sé mak bele executa no sé mak bele cumpre?

Ha'u hanoin, ha'u ko'alia hanesan ne'e, sei iha tempo seluk mak ha'u sei ko'alia filafali, iha tempo seluk.

Obrigado.

Sr.^a **Presidente**: — Obrigado, Sr. Deputado.

Maibé Ita-Boot labele husu atu IX Governo *start* iha dia 1 de julho, tanba nia programa seidauk mai. Em transição o orçamento, bele buat seluk, ne'ebe calma! A não ser urgente ho emergência, sim! Mas atu halai *tanpa* programa, não pode! Ida-ne'e tem que claro. Hanesan Deputado tem que hatene!

Tuirmai, Sr. Deputado José da Cruz.

Sr. **José da Cruz** (FRETILIN): — Obrigado, Sr.^a Presidente ho composição da Mesa.

Bem-vindo ba Sr. Vice-Ministro Assunto Parlamentar nian ne'ebé sai tilun no matan ba membro Governo sira hotu iha IX Governo, caros colegas distintas e distintos Deputados, mória no povo rona-na'in sira iha território nacional no diáspora.

Hanesan ita hotu-hotu acompanha ona iha loron hirak liubá, quase ita preocupa ho inundaçon ne'ebé acontece. Hotu-hotu declara katak iha município hitu mak afetado. Infelizmente, iha parte balu ita la temi iha-ne'e, maibé bainhira ita precisa, ita bá husu ba sira atu apoia ita, hanesan iha Município Bobonaro iha posto administrativo ida-ne'ebé baliza duni ho Suai, Posto Administrativo Lolotoe. Ita hotu-hotu, iha tempo campanha, dala ruma tun ba to'o iha-ne'ebá hodi marca ita-nia promessa sira, maibé iha situaçon ne'ebé difícil hanesan ne'e, ita la buka atu hatene tuir ita-nia povo iha posto sira-ne'e di'ak ka lae.

Horisehik, iha 4h00, Administrador Posto Lolotoe informa mai dehan katak Posto Lolotoe até agora seidak hetan apoio equipamento pesado ruma atubele bá normaliza estrada sira iha-ne'ebá, e situaçon ida-ne'e grave tebes.

La'ós estrada de'it, maibé resultado husi inundaçon ida-ne'e afeta mós comunidade barak ninia hela-fatin. Iha Suco Lupal uma permanente ne'ebé hetan estragos por volta 32, ho nia nível gravidade la hanesan, iha uma hitu mak nia nível de gravidade ne'e boot tebes. Tanba ida-ne'e, Sr. Vice-Ministro iha-ne'e, ne'ebé sai tilun no matan ba Membro do Governo sira, bele tatoli liafuan hirak ne'e iha Ita-Boot sira-nia Conselho de Ministros, nune'e bele halo intervençon imediata iha terreno.

Iha-ne'e mós atu hateten dehan katak haree filafali ba iha preço necessidade básica iha posto ne'ebé ha'u temi, ita-nia vendedor sira balu começa halo ona especulaçon de preço. Husu ba AIFAESA I.P. atubele halo intervençon porque ema labele foti oportunidade iha momento crítico sira nune'e atubele buka lucro iha povo nia leet.

Tuir filafali mai, lamenta mós ba Ministério balu, ne'ebé foin tama de'it, seidak halo serbisu, hahú ona exonera funcionário hirak ne'ebé, balu, ninia processo recrutamento ne'e liuhusi concurso público. Ida-ne'e lamentável tebes.

Hanesan ohin Sr.^a Presidente Parlamento hateten ona, katak Governo nia programa seidak mai e orçamento seidak retifica, maibé exercício poder ne'e haree ba contrário la halimar, ministro ida ne'ebé iha Governo de transiçon e em gestão hela halo ona exoneraçon. Exoneraçon hirak ne'e acontece, nia consequência ne'e ba iha povo, ba timoroan sira hotu, la'ós ba parte ida nian de'it. VIII Governo ne'ebé uluk halo recrutamento ba sira mós tanba iha necessidade, la'ós tanba iha interesse do partido nian de'it. Maibé, timoroan sira-ne'e, ohin loron se exonera duni sira, automaticamente sei contribui ba número desemprego iha ita-nia Rai laran. Situaçon sira hanesan ne'e ita tem que hakotu nia corrente.

Ha'u hanoin, iha tan ponto balu, maibé tanba tempo.

Obrigado, Sr.^a Presidente.

Sr.^a **Presidente**: — Srs. Deputados, calma! Loos, decisões atu recruta mós ba povo, mas labele haluha, Srs. Deputados, katak emprego la'ós de'it Função Pública, para ita claro. Osan, ita dehan ona

atu monu ona ba precipício, mas ita haluhan tiha, ita hanoin poço boot osan iha ita-nia sorin. Ita sei to'o iha ne'ebá, orsida ha'u sei iha *overview*.

Antes de continua, sei iha nove Deputados iha ponto de ordem, Sr. Deputado fundamenta a sua intervenção.

Faz favor, Sr. Deputado Gabriel.

Sr. **Gabriel Soares** (CNRT): — Obrigado, Sr.^a Presidente.

Bom dia ba Ita-Boot, Mesa, colega distinto Deputado sira.

Ha'u la'ós halo defesa de honra, maibé ha'u mós hakarak atu clarifica uitoan de'it ba Deputado Dário Madeira. Ita hotu Deputado mai husi foho, MAFO (Maun Alin Foho Oan), ne'ebe, realidade ne'ebé ami hatete iha-ne'e ita lalika saida, maibé ami relata de'it kona-ba situação ne'ebé mai husi ita ida-idak nia fatin, ita ida-idak nia município, ne'ebe la bosok ida, Sr. Deputado.

Segundo, ha'u hakarak atu hatete ba colega Deputado ida foin hatete: «Ita mesak timoroan, Governo ne'e foin bá, exonera ona funcionário sira». Governo la exonera funcionário ida, Deputado! Funcionário ne'e nia *hak* ne'e absoluta. Maibé, ba cargo chefia sira-ne'e, ida-ne'e ho nia tempo mós. Experiência uluk, Sr. Deputado, ita mesak timoroan iha-ne'e, ita hotu tuur iha-ne'e, CNRT mós sofre consequência ida-ne'e. Ohin foti ba cargo chefia, ba administrador posto ka administrador ida ka cargo chefia ida, aban exonera, justificação saida? Sá justificação mak fó mai? Be sira exonera iha kotuk ba ne'e timoroan ka lae? E sira-ne'e husi ne'ebé?

Sr.^a **Presidente**: — Sr. Deputado, um minuto.

Sr. **Gabriel Soares** (CNRT): — Um segundo tan.

Preço sasán sa'e, ita husu ba ita-nia an rasik! La'ós sira mak hakarak inventa sasán folin, Sr. Deputado, maibé iha Uma-Fukun ida-ne'e mak aprova duni lori hasa'e taxa. Taxa ne'e mak prejudica, halo sasán nia folin sa'e ne'e. Ne'ebe, se ita mesak timoroan, hanoin ba timoroan, oinsá ita hamutuk para hatún tiha fali taxa ne'e.

Obrigado.

Sr.^a **Presidente**: — Srs. Deputados, ha'u atu hato'o de'it, iha-ne'e Sr.^a Veneranda também pediu ponto de ordem, maibé Ita-Boot está registado como interveniente.

Ida seluk fali, Sr. Dário Madeira, ha'u hanoin, la trata mal ema ida, ne'ebe ponto de ordem atu hatán ha'u la fó. Maibé, Sr.^a Deputada Maria Rosa da Câmara «Bisoi», halo favor fundamenta Ita-Boot nia pedido ponto de ordem.

Ida-ne'e ikus liu que ha'u simu ponto de ordem, tanba sei iha na'in hira ohin ha'u hato'o.

Halo favor, Deputada «Bisoi».

Sr.ª **Maria Rosa Câmara «Bisoi»** (CNRT): — Obrigada, Presidente.

Bom dia ba ita hotu.

Saida mak ha'u atu ko'alia, Deputado Gabriel ko'alia ona. Ha'u secunda de'it.

Obrigada.

Sr.ª **Presidente**: — Muitíssimo obrigada.

Tuirmai, Senhores Deputados, ita bá sira ne'ebé atu intervém.

Sr.ª Deputada Helena Martins.

Sr.ª **Helena Martins Belo** (FRETILIN): — Obrigada ba tempo.

Bom dia, Sr.ª Presidente, composição da Mesa, Sr. Vice-Ministro, ne'ebé hanesan colega, companheiro, camarada, ne'ebé ohin mai fali assume cargo ida hanesan Vice-Ministro Assuntos Parlamentares, ami agradece tebes, ba colegas Deputados, audiência, rona-na'in povo maubere no buibere.

Primeiro, ha'u-nia solidariedade ba ita-nia vítima sira-ne'ebé afetado husi desastres naturais ne'ebé acontece iha município hitu ka ualu, ne'ebé hetan estragos quase total 652 famílias. Inundação ida-ne'e afeta mós ita-nia maluk na'in-tolu mak lakon vida, tanba ne'e ha'u-nia solidariedade no profundas condolências ba iha família sira-ne'ebé karik lakon ninia ema. Situação ida-ne'e afeta tebes no ema barak mak lakon fatin, lakon ninia produção, lakon mós ninia ai-han ne'ebé sira han loroloron, no implica mós ba iha infraestrutura ne'ebé atu halo ligação ba iha comunidade sira hodi halo movimento iha Rai-laran. Tanba ne'e afeta tebes, oinsá Governo ida-ne'e bele lori ajuda humanitária atu atende lailais ita-nia população sira-ne'ebé sai vítima.

Tanba ne'e mak husu IX Governo, - ami mós hatene katak foin mak assume cargo e hasoru kedas ona desastre ida-ne'e, ita hotu la espera, natureza agora daudaun mós sei arma tempo nafatin - hanesan representante povo, ami hakarak mak oinsá Governo bele fó atenção hodi salva lailais tiha ita-nia vítima sira no atende lailais ita-nia comunidade sira, tanba ho desastre ida-ne'e, além de lakon sasán, cria mós condições ne'ebé ba ita-nia maluk sira hodi halo especulação ba preço sasán, tanba ne'e mak agradece ba hotu-hotu atu oinsá serviço ho di'ak hodi bele reduz volume ne'ebé ita-nia maluk sira sente daudaun, e aumenta tan fali ho especulação preço, então halo com que ita-nia povo ne'e sente todan liután. Tanba ne'e mak husu oinsá Sr. Vice-Ministro bele encaminha hela ami-nia informação ida-ne'e.

Ha'u apoia mós ba colega, companheira, Deputada Teresa ninia intervenção ohin, kona-ba ita-nia funcionário sira-ne'ebé contratado, tanba Lei n.º 5/2009, ne'ebé altera Lei n.º 8/ 2004, Estatuto

função pública, artigo 27.º, ko'alia kona-ba contrato de trabalho a termo certo, contrato a termo certo ne'e halo acordo bilateral iha quadro legal baseia ba necessidade transitória ho duração serviço ne'ebé ministério ida-idak determina. Tanba ne'e mak ita-nia funcionário sira-ne'e, oinsá mak atu bele iha acesso ba sira-nia direito, ne'e ho explicação ne'ebé di'ak para sira mós bele compreende.

Ha'u fiar katak Sua Excelência atual Primeiro-Ministro, Sr. Xanana Gusmão, sei la halo tuir ida-ne'ebé ita halo ódio fali iha governação ida-ne'e. Tanba saida? Ema inimigo de'it, invasor de'it ita sei halo reconciliação, nu'usá mak ita timoroan ne'e labele fali? Ida-ne'e sinal ne'ebé hatudu katak Maun Boot sei la halo política de ódio vingança ba iha parte sira-ne'e, tanba quando despede sira mós, ita halo com que sira mós perde economicamente, família hira mak lakon ida-ne'e. Tanba ne'e mak ha'u fiar katak Sr. Xanana sei la halo ida-ne'e.

Ita mós agora daudaun ita-nia jovem sira sai bá buka serbisu iha rai-li'ur mak barak, ne'e hatudu katak ita-nia gestão iha ita-nia Estado ne'e ladún máxima atu atende ita-nia jovem sira, tanba ne'e, di'ak liu mak ita hotu-hotu nia colaboração ho coordenação hamutuk atu oinsá halo investimento. Ha'u concorda ho Presidente Parlamento nian ne'ebé ohin dehan emprego la'ós de'it funcionários, então oinsá mak atu cria condições para mós fó condições de vida digna iha rai-laran.

Ikusliu, ha'u sei fundamenta nafatin resolução ne'ebé ita aprova iha V Legislatura, kona-ba devolução de restos mortais herói sira desaparecido, tempo ona tanba veterano sira-ne'e quase idade ba daudaun ona, barak liu mak la iha ona, no general sira-ne'ebé iha começa mate daudaun ona. Então, oinsá mak ita reforça malu para halo desenvolvimento lailais, oinsá fó solução lailais ba iha devolução ne'ebé ita aprova iha resolução iha V Legislatura.

Ida-ne'e mak ha'u hakarak fó hatene iha ha'u-nia intervenção ne'e.

Obrigada ba Sr.^a Presidente.

Sr.^a **Presidente**: — Molok ha'u adianta, ainda tem um pedido de ponto de ordem. Ha'u espera katak ida-ne'e ikus liu ona, e ha'u taka ba ponto de ordem, a não ser para defesa de honra. Está bem?

Sr. Deputado António da Conceição.

Sr. **António da Conceição «Kaloan»** (PD): — Obrigado, Sr.^a Presidente.

Ha'u foti ponto de ordem ne'e atu husu Sr.^a Presidente equilibra situação ida-ne'e hanesan mós horisehik. Quando iha ponto de ordem ne'ebé tenta atu responde, halo favor, hola medida sira-ne'ebé mais justa, para labele iha tendência de inclinação.

Obrigado.

Sr.^a **Presidente**: — Muito obrigada, mas tem que fundamente ponto de ordem hodi halo saida, selae ita intervém hotu, ha'u susar.

Ne'ebe, tuirmai, Sr.^a Deputada Sância Bano.

Sr.^a **Sância Florência Paixão Bano** (FRETILIN): — Obrigada.

Ha'u-nia respeito ba Presidente Parlamento Nacional, composição da Mesa, no Vice-Ministro Assuntos Parlamentares nian.

Ha'u atu ko'alia lailais de'it assunto RAEOA nian, hanesan horisehik intervenção husi Deputado Natalino ho Firmínio.

Ha'u hakarak hatete de'it iha-ne'e katak kona-ba recrutamento APS, (Ami Pronto Serbí), ida-ne'e la'ós funcionário, maibé criação programa estágio profissional público. Ne'e política autoridade RAEOA nian, ida-ne'e prepara condição ne'ebé iha qualidade ba jovem sira.

Ita hotu-hotu ko'alia kona-ba desemprego barak, jovem barak sai serbisu iha li'ur. Ha'u, hanesan Oe-Cusse oan, contente tebes tanba bele capacita jovem sira-ne'ebé serbisu, ne'ebé bele halo estágio iha cada divisão ka cada instituição ne'ebé estabelece iha RAEOA. E ha'u hakarak ko'alia tan katak ida-ne'e liuhusi deliberação RAEOA n.º 3/2023, ne'ebe mak publica ona iha Jornal da República iha fulan-março liubá, ne'e la'ós dehan ami buka votos iha tempo campanha, lae! Agora iha ona 1857 ne'ebé regula ona no pedido aprovação contrato ne'e iha ona, ne'ebe continua serbisu.

No mós ha'u hakarak esclarece tan iha-ne'e katak horisehik mós iha assunto balu kona-ba projeto sira. Projeto sira-ne'ebé acontece iha RAEOA ne'e loke ba público, no mós projeto sira-ne'e liuhusi Lei Aprovisionamento ne'ebé estabelece. Ne'e liuhusi *tenderização*, sé de'it bele compete.

Ida tan mak, projeto sira-ne'e, ne'ebé estabelece iha RAEOA, la'ós hanesan Pacote Referendo ne'ebé acontece tinan sanulu liubá, atu fó de'it ba grupo sira-ne'ebé bele ou iha se sira pronto, lae! Mas, ida-ne'e liuhusi competição ne'ebé regula no mós loke ba público. E, ha'u hakarak esclarece tan iha-ne'e katak iha projeto balu mak sei abandona duni iha RAEOA, exemplo hanesan projeto Jardim Lifau no mós projeto Jardim Oebau, ida-ne'e ha'u mós esclarece iha-ne'e atu mós bele iha fiscalização iha assunto refere.

Kona-ba exoneração, ne'ebé horisehik ko'alia sai, katak iha tempo eis-PA (Presidente Autoridade) Lugu, halo ba Deputado Firmínio, ida-ne'e la loos! Ida-ne'e la loos tanba iha tempo ne'ebá Sr. Deputado Firmínio iha licença sem vencimento durante tinan lima.

Ha'u hakarak esclarece tan iha-ne'e katak precisa mós ita hotu-hotu iha referência ida. Ita ko'alia desde semana liubá, iha problema inundaçã, lixo iha fatin-fatin, ha'u dehan iha-ne'e katak Oe-Cusse ka RAEOA mós bele sai referência ne'ebé moos iha fatin hotu-hotu.

Obrigada.

Sr.^a **Presidente**: — Ha'u iha ponto ida que ha'u hakarak husu ba Sr.^a Deputada Sância. É de estranho, Ita-Boot hatete estagiário, iha contrato? Não sei, explica to'ok ida-ne'e!

Sr. Deputada Sância Bano fô gesto atu fô explicação ba Sr.ª Presidente.

Não explica agora! Pode ser depois. E depois, sira selu hanesan funcionário? Ha'u la hatene ida-ne'e tanba, desculpa, ami bá Oe-Cusse, Presidente Autoridade la explica ida-ne'e. Tanba ne'e mak Deputada Lúcia ohin foti. Comissão C la hatene, mas bele fô explicação, tanba nune'e, Senhores Deputados, a fiscalização efetiva no eficaz das comissões especializadas, por favor.

Ne'ebe ha'u husu, ha'u mós hatene Sr. Deputado Natalino husu ponto de ordem, mas ohin ha'u taka ona.

Se iha assuntos de urgência, Ita-Boot bele hato'o mai ha'u, mas ha'u la loke,

Sr. Natalino dos Santos Nascimento (CNRT): — Defesa de honra, Sr.ª Presidente.

Sr.ª Presidente: — Mas ohin ninguém temi Ita-Boot nia naran, por amor de Deus.

Sr. Natalino dos Santos Nascimento (CNRT): — Temi, temi! Para ha'u clarifica, selae orsida mídia dehan ne'e bosok, informação falso. Ha'u Deputado, lakohi ko'alia bosok, ne'e hakarak defesa de honra.

Sr.ª Presidente: — Está bem! Se defesa de honra, são três minutos. Ha'u ohin la rona, desculpa, tanba ha'u ko'alia hela. Faz favor, Sr. Deputado Natalino, três minutos para defesa de honra. Obrigado.

Sr. Natalino dos Santos Nascimento (CNRT): — Sim, obrigado, Sr.ª Presidente.

Ha'u hakarak halo defesa de honra tanba, bainhira, nu'udar Deputado, foti assuntos iha-ne'e ne'e tanba factos e iha evidência.

Se ohin dehan katak ne'e falso, ha'u hakarak justifica!

Recrutamento ida-ne'e, primeiro, tendencioso, partidarismo; Segundo, recrutamento iha tempo de campanha; Terceiro, Governo local ka autoridade halo contrato ho sira, e agora ema sira-ne'e sei sai vítima tanba sira rasik, balu, foin daudaun semana passada ha'u bá sira hatete: «Ami-nia *nasib* ne'e halo nu'usá?» e quase 2440.

Dados mak ne'e!

Sr. Deputado Natalino hi'it sa'e dadus iha surat-tahan, ne'ebé nia refere bá.

Ha'u Deputado ida, lakohi ko'alia bosok. Nu'udar Deputado, hakarak fó informação claro porque 2440 sei sai vítima. Sira bá loke ona conta bancária loroloron iha BNCTL e ha'u husu ba sira: «Tanbasá imi mai iha-ne'e?» «Ami atu sai funcionário!» Ne'e sira-ne'ebé dehan APS ne'e mak hatete. Tanba ne'e ha'u, nu'udar representante povo, representa mós sira atu ko'alia sira-nia direito ne'e para sira labele sai vítima.

Ha'u hatene katak recrutamento ne'e iha tempo campanha atu hetan votos, tanba ida-ne'e hakarak atu hadi'a, atu husu ba Parlamento Nacional atu halo fiscalização ba assunto ne'e para povo ne'e labele sai vítima.

Segundo, kona-ba *tenderização*, familiarismo, partidarismo! E companhia rua ka tolu mak hetan haat ka lima. Tuir Lei Aprovisionamento, ne'e contra regras. Ha'u foti exemplo rua de'it: *Lifau Indah* ne'e hetan tolu to'o haat, ida fali *Lisuk* mós hetan tolu to'o haat. Tanba ida-ne'e mak ha'u haree katak questão ida-ne'e empresário oan sira iha-ne'ebá dehan katak só cor ida de'it mak hetan, só família grupo oan ida de'it mak hetan projeto iha Oe-Cusse. Tanba ne'e, ha'u, nu'udar representante povo, hakarak husu investigação kle'an para labele iha discriminação. Quase 850 milhões tau ba iha Oe-Cusse, maibé desenvolvimento la la'o tanba de'it grupo ki'ikoan ida mak beneficiário ba Orçamento do Estado ida-ne'e, e, tem que halo fiscalização ba orçamento ne'ebé, quando executa la hotu, tau hela iha fundo economia especial ne'e, sira usa para beneficia empresário oan sira, liuliu iha projeto Cesta Básica. Tanba ne'e mak horisehik ha'u husu atu halo investigação. Ne'e factos.

Ha'u Deputado ida, lakohi mai bosok iha-ne'e! E, ha'u ko'alia tanba ne'e despesa Estado boot tebetebes, desenvolvimento la la'o e desenvolvimento la iha equilíbrio: Iha injustiça boot ba iha Atoni Oe-Cusse, liuliu iha posto haat, Posto Oesilo, Nítibe, Pásabe la hetan desenvolvimento, *padahal* osan ne'e boot tebetebes iha Oe-Cusse.

Sr.^a Presidente, ha'u hakarak justifica katak ne'e factos, ha'u husu inquérito ou bele karik halo fiscalização imediata.

Obrigado.

Sr.^a **Presidente**: — Srs. Deputados, papel do Deputado iha tolu, ida mak fiscalização, maibé, ha'u durante tinan 15 iha-ne'e, fiscalização mai ko'alia kulit de'it, mas essas matérias não têm. Tem que husu! Todas as partes, atu oposição ka la'ós, Ita-Boot sira iha comissão tem a representatividade, façam os trabalhos! Tanba ida-ne'e mak tem que halo duni, selae ita mós gasta osan saugate, mas la fiscaliza loloos. Ne'e ka, Srs. Deputados?

Mais uma vez chamo a responsabilidade das comissões especializadas permanentes, quero os relatórios e, ha'u hanoin, Sr. Vice-Ministro iha-ne'e mós hein hela relatório.

Tuirmai, Sr. Deputado David Mandati.

Sr. **David Dias Ximenes «Mandati»** (FRETILIN): — Obrigado, Sr.^a Presidente.

Ba maluk Deputado sira hotu, ha'u atu ko'alia, reforça de'it declaração política KHUNTO ninian kona-ba terrenos.

Iha-ne'e, iha artigo 54.º, Direito à propriedade privada, iha ponto 4, dehan katak «Só cidadão nacional sira mak iha direito atu iha rai nu'udar propriedade privada», maibé ohin loron iha Timor acontece oin-seluk.

Lei ida iha katak só timoroan sira mak iha direito, maibé ohin loron jogo ne'e oin-seluk fali, sira hakarak sosa rai, usa fali timoroan sira mak ba oin e depois timoroan sira mak tau sira-nia naran e sira sosa.

Agora, ha'u-nia hanoin mak ida-ne'e: Há um caso concreto, iha Fatuhada, bele dehan ba Governo atu ko'alia ho Liurai Fatuhada, nia sei dehan.

Mas ha'u haluha tiha, antes de ha'u ko'alia tan pontos balu, ha'u hakarak congratula ita-nia maluk, Sua Excelência Dr. Adérito Hugo, ne'ebé hetan posição foun, promoção foun ba fatin ida-ne'e. Parabéns ba Ita-Boot! Ha'u hein katak Ita-Boot contente ho fatin ida-ne'e.

Ida seluk fali, ohin dehan katak iha artigo 50.º, Direito ao trabalho, ha'u lakohi iha-ne'e condena se uluk halo ka la halo ka, só que iha-ne'e iha contemplação husi ita-nia Constituição dehan nune'e: «Cidadão ida-idak, feto ka mane, iha direito no dever atu serbisu no hili profissão ne'ebé nia hakarak», ne'e ponto 1. Ponto 3, «Labele iha despedimento sem justa causa ka tanba de'it motivo político, religioso ka ideológico».

Maluk sira, ita quando haree ba buat sira-ne'e, ita labele fó culpa ba malu. Ida halo ida responde, ida halo ida responde, os mais fracos que pagam as favas.

Kona fali ba estrada Baguia ninian, mesmo Sr.^a Presidente mós hatene, desde que ha'u tama iha-ne'e ha'u sempre ko'alia kona-ba estrada Baguia. E, ha'u ko'alia rasik ho Sr. Primeiro-Ministro atual, agora mak tomada de posse, nia halo decisão ida halo pacote: Castelo, Escola Daudere ho estrada Laga Baguia. Nia la bele halo tan saida? Tan ninia governação mós hotu.

Ha'u hanoin katak aprovação ba estrada ida-ne'e la'ós tanba campanha, la'ós! Balu horisehik no horibainrua mak foin tinan hira iha-ne'e hatete fali katak tanba ida-ne'e halo besik eleições, ne'e la'ós! Ne'e Primeiro-Ministro ida agora ne'e hatene e, sé mak ko'alia ho nia, ha'u duni mak ko'alia ho nia. Ema seluk ne'ebé, hanesan a partir de ita-nia Presidente do Parlamento, Secretária sira tuur iha leten no Vice sira, hatene, katak saida mak ha'u ko'alia iha-ne'e kona-ba estrada ida-ne'e. Tan saida? Ita, quando bá Baguia, ema dehan «Boboot sira iha Díli, ita iha-ne'e, tem que sa'e carreta boot mas *tangan di atas*» Ida-ne'e! La'ós dehan katak tan campanha.

Se ida-ne'e agora começa halo, depois dehan katak hapára, ita sei ulun fatuk moras, ita sei ko'alia fali lai iha-ne'e porque Primeiro-Ministro hatene problema ida-ne'e. Primeiro-Ministro atual hatene problema ida-ne'e tan ha'u mak ko'alia duni ho nia.

Muito obrigado, Presidente.

Sr.^a **Presidente**: — Sr. Deputado, ida ohin Ita-Boot temi ema estrangeiro usa via timoroan só sosa rai, ita timoroan mak beik. Ha'u husu desculpa, mas tem que investiga ida-ne'e e dala ida tan, Senhores da Comissão A, ne'e matéria Ita-Boot sira-nian, tau matan bá! Inclui intervenção do Partido do KHUNTO ohin, é matéria da Comissão A. Ne'ebe lalika ansi atu ba fiscaliza iha li'ur, haree lai!

Ha'u hatete, infraestruturas, estradas, buat sira-ne'e continuidade de um Governo para outro, ita atu critica mós tem que iha continuidade. Ne'ebe, tanba ita-nia ne'e orçamento anual, infraestruturas é plurianual, ne'ebe mai ita hotu tau matan ba ita-nia povo ida-ne'e. Critica não resolve nada, critica com soluções para ita fó mós solução ba Governo, *kasian*!

Ita hotu, nação em desenvolvimento, lalika ita mai, ita critica ida-ne'e bele labele, hotu-hotu bele, sim senhora, mas fó oportunidade. Está bem? Ne'e para ita calma, lalika hirus malu.

Tuirmai, Sr. Deputado Luís Roberto.

Sr. Luís Roberto da Silva (KHUNTO): — Obrigado, Sr.^a Presidente Parlamento Nacional.

Bom dia ba Sr.^a Presidente do Parlamento Nacional, ba membro da Mesa tomak. Bom dia mós ba Sua Excelência Sr. Vice-Ministro dos Assuntos Parlamentares, ba colega Deputado no Deputada sira, ba audiência tomak, ba mídia no ba povo doben Timor-Leste.

Iha assunto ida ka rua ne'ebé ha'u hakarak hato'o.

Primeiro maka, bainhira ha'u acompanha intervenção maluk Deputado sira-nian, ita dala barak liu halai ba estrada, bee moos, eletricidade, ida-ne'e hanesan natureza ida-ne'ebé ko'alia beibeik iha Parlamento ida-ne'e. Mas ha'u hakarak hatete de'it katak Timor ne'e quando restaura ninia ukun an ka independência ba tinan ruanulu resin ida, tuir loloos infraestrutura básica sira hanesan estrada, bee moos no eletricidade ne'e ita lalika ko'alia tan, agora ne'e ita ko'alia kona-ba reabilitação, tuir loloos.

Ne'ebe, ha'u hakarak Representante Povo ne'ebé iha Parlamento Nacional lalika hatudu liman ba malu beibeik, ha'u lakohi para kuda vingança política iha fuan. Se kuda vingança iha fuan mak desenvolvimento nacional sei la la'o ba oin e nunca mais atu la'o ba oin, mak nafatin hanesan ne'e hela de'it. Ida-ne'e ha'u hakarak fó hanoin de'it ba colega Deputado sira hotu.

Segundo mak problema, *issue* nacional ida kona-ba ita-nia passaporte ka caderneta ba passaporte la iha ou seidauk iha, halo impedimento boot ida ba ita-nia alin estudante sira, ba ita-nia cidadão sira-ne'ebé moras no mós ba jovem sira-ne'ebé hakarak sai ba serviço iha rai-li'ur tanba serviço iha rai-laran la iha. Ne'e hanesan impedimento boot ida ba sira. Tanba ida-ne'e mak Bancada KHUNTO husu IX Governo atubele acelera mós ida-ne'e.

Hanesan mós Sr.^a Presidente foin ko'alia, IX Governo seidauk apresenta ninian programa mai iha Parlamento Nacional, maibé baseia ba artigo 108.^o Constituição RDTL, iha número 2, hatete

hanesan ne'e: «Depois de Governo simu tiha ninia knaar, iha 30 dias nia laran tem que ser apresenta ninia programa do Governo», tanba ida-ne'e mak ami Bancada KHUNTO ne'e husu, karik ida-ne'e sei iha fase preparação Governo atu lori nia programa mai, ami husu mak Sr. Vice-Ministro atu hato'o ba Ministério da Justiça coopera hamutuk ho di'ak ho PCM (Presidente do Conselho de Ministros) atu oinsá bele haree ba assunto ida kona-ba caderneta ba passaporte nian tanba buat ne'e ki'ikoan ida. Ne'e nação, mas de vez em quando passaporte la iha, ita-nia nação vizinho sira-ne'e hamnasa ita.

Claro que iha Governo anterior de vez em quando la alcança buat ida-ne'e. Iha Governo anterior, tuir informação ne'ebé ha'u rona, iha ona contrato ho companhia internacional balu atu cria caderneta ne'e iha fulan-setembro, maibé loos ka lae, ida-ne'e seidauk claro ba ha'u. Ne'ebe, ha'u husu ba Sr. Vice-Ministro, ha'u fiar katak Ita-Boot mós iha-ne'e mak ba, hatene muito bem kona-ba ida-ne'e, bele relata ba ita-nia maluk sira-ne'ebé agora assume pasta ne'e atubele toma responsabilidade ba assunto ida-ne'e.

Ikusliu mak ha'u hakarak ko'alia uitoan kona-ba funcionário casual sira ou contratado sira-ne'ebé agora *viral* loos iha Timor iha mídia social ne'e, katak política ida tama hasai fali ida-ne'ebá. Ha'u dehan, ida-ne'e hanesan natureza ida ona. Cada Ministro, quando tama ho pacote ida, por exemplo ho 11 pessoas ba apoio político iha Gabinete Ministro ida, nia sai mak tem sai duni, ne'e sai duni! Ne'e natureza tiha ona ba ita. Como agora iha concurso público balu ne'ebé sira submete, maibé dehan katak hasai hotu, ida-ne'e mak ita precisa halo investigação kle'an ida, halo investigação kle'an ida ba ida-ne'e.

KHUNTO ko'alia la'ós vingança política, KHUNTO ko'alia hakarak halo proteção ba ema hotu-hotu, tane ita-nia ema ne'e hanesan, igual, tanba KHUNTO nia missão ida mai iha-ne'e seidauk hatama ema, seidauk hasai ema. Ne'e KHUNTO nia missão. Tanba ne'e mak husu ba ita hotu-hotu, Timor ne'e ita hotu ninian, hanesan PD ko'alia ona, «Timor ne'e ida ba ita hotu-hotu», la'ós Timor ne'e ida ba grupo ida ka grupo rua de'it, lae! Ita hotu ninian. Tanba ida-ne'e, mai ita hamutuk hodi cria campo de trabalho iha Timor ne'e para ita-nia maluk sira hotu-hotu bele iha acesso ba serbisu. Ida-ne'e mak importante, labele ida manán tiha hatún fali ida seluk, ne'e ladún di'ak.

Obrigado, Sr.^a Presidente.

Sr.^a **Presidente**: — Muito obrigada.

Ha'u espera katak filosofia ida-ne'e la'ós iha *lips*,ibun de'it, maibé iha ita-nia ação, a ação é que torna a realidade e a prática.

Tuirmai, Sr.^a Deputada Maria Angelina.

Sr.^a **Maria Angelina Lopes Sarmiento** (PLP): — Obrigada, Sr.^a Presidente, bom dia.

Bom dia mós ba membro da Mesa sira, no bom dia e bem-vindo ba Sr. Vice-Ministro dos Assuntos Parlamentares, *muka lama dengan seragam baru*. Parabéns.

Ha'u hakarak comenta nafatin ba estrada Laga-Baguaia, ne'ebé horisehik ha'u mak levanta e secunda husi distinto Deputado sira balu. Tanba estrada Laga-Baguaia, Uiaca-Quelical, Ossu, ne'e prevê iha Fundo Infraestruturas iha OGE 2023, no projeto ida-ne'e *ongoing* ka agora *under construction*, tanba ne'e mak horisehik ha'u foti atu husu: - infelizmente Sr. Vice-Ministro la marca presença, maibé ami hakarak husu explicação - declaração ida-ne'e meramente declaração política ka baseia estudo técnico ruma? Tanba estrada ida-ne'e halo liuhusi visto prévio Câmara de Contas nian, ne'ebé autoriza ona, fó visto ona, katak estrada ne'e bele halo e agora daudaun *under construction*. Ne'ebe, se projeto sira-ne'ebé Ita-Boot sira hakarak cancela ne'e, karik ida-ne'ebé mak *under design*, sei iha plano, ne'e outra coisa, mas processo la'o ona, liuliu tanba nia cumpre regras aprovisionamento nian, ne'e razão saida hakarak atu hapára? Ka keta hapára atu muda companhia ida ba fali seluk. Ne'ebe, ami hakarak husu certeza.

Agora, ha'u mós surpresa, Deputado ida horisehik declara dehan, baseia referência sira estrada sira-ne'e halo de'it lançamento primeira pedra ka *peletakan batu pertama*, depois la iha máquina ida, e halo referência ba estrada Laclúbar. Ne'e ha'u surpresa loos tanba estrada Laclúbar ne'e to'o agora seidauk iha lançamento primeira pedra. Estrada Laclúbar mós la preenche requisito tolu husi *kriteria* aprovisionamento nian ba emergência. *Kriteria* tolu hanesan: tem que iha ona estrutura existente, hanesan estrada ka ponte iha nanis, ou lori risco ba ema nia vida ka causa desastres naturais ne'ebé lori risco ba ema nia vida. Iha estrada Laclúbar nia situação, tolu ne'e ida de'it mak preenche, rua la preenche, tanba ne'e mak Governo Dauluk ne'e, VIII Governo ne'e, la halo adjudicação direta tanba la preenche requisito ida *kriteria* emergência nian. Mas horisehik dehan fali lançamento primeira pedra ne'e mak ha'u mós hakfodak. E ha'u confirma ho membros da Comissão E, ohin ha'u espera Presidente Comissão E atual, Sr. Deputado Marcos, atu pronuncia buat ruma, tanba sira mak hatene muito bem. E tuir ha'u-nia hatene, estrada Laclúbar seidauk iha lançamento primeira pedra. Tanba ne'e mak ami husu atu Governo ida-ne'e fó continuidade, tanba VIII Governo Constitucional hala'o ona processo sira, liu visto prévio Câmara de Contas nian, preenche requisito sira, CNA (Comissão Nacional de Aprovisionamento) mak loke e halo aprovisionamento, e evita o máximo possível atu halo adjudicação direta hanesan hábito sira balu liubá. Ne'ebe, ha'u hanoin, tem que fó andamento ba estrada ida-ne'e. E estrada Quelical, Laga, Baguia, distinto Deputado «Mandati» ohin ko'alia, e iha V Legislatura mós ami Deputado sira husi Quelical oan lubuk ida mak levanta hela de'it to'o Governo halo duni processo ida-ne'e. Ne'ebe, ha'u fiar katak Governo ida-ne'e iha espírito patriotismo que aas atu continua projeto ida-ne'e e la halo mudança ka alteração. Ha'u hein katak Programa Governo nian mai mós sei la halo alteração.

Ha'u hakarak comenta tan uitoan mós kona-ba recrutamento ba funcionário público, ne'e desde 2015 kedas Governo decide congela halo recrutamento ba funcionário público sira tanba ita-nia número funcionário público sira boot demais ona. E ninia implicação ba funcionário permanente sira mak ladún iha produtividade, serviço mós avaliação di'ak-di'ak de'it, mas o trabalho do Governo ne'ebé atu sira hanesan máquina do Estado atu apoia Governo ne'e la'o hanesan baibain hela, então congela tiha iha 2015. Maibé, iha Decreto Governo mós dehan sei atu halo recrutamento karik baseia necessidade no mapeamento quadro pessoal sira-ne'ebé cada ministério precisa, então ho ida-ne'e mak ministério sira halo recrutamento. Ne'e, ha'u hanoin, baseia mós ba sira-nia necessidade, la'ós halo recrutamento ida que la baseia ba estudo ruma.

Ho nune'e mak, ha'u hanoin, distinto Deputado sira bele haree iha Ita-Boot sira-nia Mesa, iha informação ne'ebé hato'o husi Presidente Comissão Função Pública, liuliu halo referência ba 106 vagas ne'ebé recrutamento husi MTCI, Ministério Turismo Comercio e Indústria nian. Ita-Boot sira kaer mós ba referência ida-ne'e, e processo la'o tuir enquadramento lei, decreto-lei ne'ebé iha no mós processo la'o tuir dalan. Ida-ne'e mak ha'u hakarak hato'o.

Muito obrigada.

Sr. **Presidente**: — Muito obrigada.

Orsida ha'u sei halo *overview* ba intervenções, Srs. Deputados, porque balu *memang* iha duni problemas.

Tuirmai, Sr.^a Deputada Veneranda Lemos.

Sr.^a **Veneranda E. M. Lemos Martins** (CNRT): — Obrigada, Sr.^a Presidente.

Dadeer di'ak ba ita hotu no mós ba composição da Mesa, ba mídia no povo doben rona-na'in, ba caros colegas.

Bem-vindo ba Sr. Vice-Ministro, leron hirak nia laran hein hela Ita-Boot iha-ne'e, mas enfim Ita-Boot mai, karik tanba Conselho de Ministros remata ona.

Ha'u atu hahú dehan hanesan ne'e: intervenções husi colega Deputado balu ne'ebé ko'alia barak liu kona-ba recrutamento, kona-ba apontamentos políticos, etc, ita ko'alia hanesan anjo, ita haluha tiha saida mak acontece iha kotuk, hanesan horisehik ha'u hatete. Depois ita hatete tan: «Labele halo discriminação!». Se ha'u hakarak atu hatán ba ida-ne'e karik, ha'u dehan: «*Sebelum padamu, sudah padaku, dulu "mandamu", sekarang "mandaku"*», ne'ebe, ita tuir de'it ritmo saida mak ita halo, la'ós ho ódio vingança. Maibé ha'u hakarak atu fó hanoin filafali de'it ita katak iha Governo ida foin liu bá daudauk ne'e, nafatin iha ita-nia memória katak iha cargo de chefia sira-ne'ebé halo recrutamento tanba ninia mérito, sei iha hela nia funcionamento mós ita exonera. Ida-ne'e cargo

de chefia sira balu lori ona ba Tribunal, e balu hetan ona ponto positivo ne'ebe hatete katak saida mak Ministério balu halo ba sira ho exoneração ne'e la tuir regras. Ida-ne'e iha ona.

Anyway, Sr. Vice-Ministro, horisehik mós ha'u foti questão lubuk ida kona-ba assuntos sociais nian, tanba ha'u haree Ita-Boot iha-ne'e, ha'u mós hakarak atu repete filafali ka fó filafali ênfase ba questões ne'ebé ha'u foti, liuliu kona-ba subsídio idoso no bolsa da mãe ne'ebé VIII Governo la selu desde 2021 mai to'o 2022, fulan-setembro nia laran, kona-ba bolsa da mãe.

Segundo, kona mós ba trabalhador sira-ne'ebé serbisu ba iha Cesta Básica, ne'ebe CLN mak recruta, to'o agora hamutuk ema na'in-ualu mak seidauk selu.

Terceiro, ha'u hakarak atu fó-hanoin mós, tanto ba Parlamento Nacional, Secretariado, no mós Governo atubele haree filafali ita-nia maluk sira-ne'ebé mate tiha ona. Ha'u hetan informação horisehik, liuliu ba ita-nia nia saudoso sira balu ne'ebé uluk serbisu mós iha Parlamento hanesan Deputado, até a data sira-nia conta bancária sei la'o nafatin. Karik Sr. Vice-Ministro bele hato'o hela ba iha Governo atu haree filafali assunto ida-ne'e, tanba ema mate desde 2020, balu mate iha 2019, até agora sira-nia conta bancária sei la'o nafatin. Ida-ne'e família mak mai hato'o, e família sente preocupado tebetebes tanba sira la hatene se aban-bainrua mak halo investigação ruma, karik sira tem que devolve osan Estado nian. Mas, ida-ne'e la'ós cabe ba ha'u-nia competência, ha'u atu hato'o de'it informação ida-ne'e para Parlamento e Governo bele tau atenção ba assunto refere.

Muito obrigada.

Sr.^a **Presidente**: — Tuirmai, Sr.^a Deputada Cedelízia dos Santos.

Sr.^a **Cedelízia Faria dos Santos** (CNRT): — Muito obrigada, Sr.^a Presidente.

Ha'u-nia bom dia no respeita ba Ita-Boot, composição Mesa, distinto Deputado sira.

Uluknanain ha'u hato'o ha'u-nia nia parabéns ba ita-nia Vice-Ministro Assunto Parlamentar no bem-vindo mai iha Uma-Fukun, Parlamento Nacional.

Ha'u iha intervenção rua mak ha'u hakarak foti iha dadeer-saan kmanek ida-ne'e.

Maibé molok ha'u atu tama ba ha'u-nia intervenção rua ne'e, ha'u hakarak hatete de'it katak ha'u concorda ho Deputada balu ne'ebé dehan, «saida mak ita kuda, ne'e mak ita ku'u», ida-ne'e mak acontece daudauk, exoneração ba ita-nia casual sira, la'ós ba ita-nia funcionário público sira. Ha'u hanoin, ita tem que tau buat ne'e iha ida-idak nia fatin. Se ita dehan fali exoneração ba funcionário público sira-ne'e, ha'u hanoin, tem que mai ho dados ida-ne'ebé loloos, ita la bele foti fatuk ida riba fali ba ai ida, então buat sira-ne'e sai la loos tiha hotu.

Tanba ne'e mak ha'u fó hanoin dala ida tan katak uluk, bainhira ita hasai ou exonera ema sira husi partido seluk, ita nunca hanoin katak sira-ne'e timoroan. Ita-Boot sira la sente saida mak ema sira husi partido oposição naquela altura sente, la'ós husi de'it cargo chefia sira, maibé to'o bá ema dehan

cleaner sira mós hetan exoneração, ida-ne'e ladún di'ak! Maibé, ha'u fiar katak governação ida-ne'e sei la halo tuir saida mak acontece tiha ona. Maibé, ha'u haree iha membro Governo balu hatete katak sira hassai de'it mak pessoal casual sira, que iha ministério balu to'o kedas 800 pessoas. Ne'e número ida boot tebes no iha impacto mós ba orçamento. Karik ba oin, sira mós sei haree didi'ak lai mak bele halo fali recrutamento tuir programa no tuir orgânica Governo nian. Ne'ebe, ha'u hanoin, ita lalika lori fali buat ne'e politiza tun-sa'e, ita iha ita-nia Vice-Ministro iha-ne'e, orsida bele explica loloos ba ita.

Depois, kona-ba estrada Laga ba Baguia, ha'u hanoin, ita mós lalika halo especulação oioin, ita iha ona ita-nia Vice-Ministro tuur hela iha ita-nia oin, ha'u hanoin, bele halo explicação claro ba ita hotu.

Ha'u tama filafali ba ha'u-nia intervenção, primeiro, ha'u hakarak ko'alia kona-ba taxa de execução ba OGE 2023 nian. Ita rona ona katak iha IX Governo ida-ne'e sei lori ninia Programa mai e tuir kedas ho Orçamento Retificativo, tanba ne'e mak ha'u hakarak fó-hanoin questão balu. Ha'u acompanha iha Portal de Transparência, to'o ba loron ohin nian, dia 11 de julho, execução ida-ne'e ninia execução real ne'e foin mak 27% de'it. Ita to'o ona metade do ano, maibé execução ida que ki'ik tebes. Ha'u hatene katak culpa ne'e la'ós IX Governo nian, tanba Governo ida-ne'e ninia Programa mós seidauk mai e Orçamento Retificativo mós seidauk mai hotu. Maibé, hakarak ka lakohi, ba oin sai duni responsabilidade IX Governo nian, tanba ne'e mak ha'u hakarak fó-hanoin hela ba Sr. Ministro, bainhira halo Orçamento Retificativo karik, halo favor ida, tau hela questão ba execução de orçamento ne'ebé ki'ik tebes husi Governo anterior nian.

Ha'u haree mós iha ministério balu, ministério lubuk boot balu, exemplo Ministério Administração Estatal, ninia execução de'it mós foin 17%, nem to'o 20%. Iha mós Ministério do Plano e do Ordenamento hotu, iha ministério barak, iha instituição barak, mak nia execução ne'e sei menos. Iha mós agência balu, nia seidauk executa, foi 0%. Então, ida-ne'e favor ida IX Governo tau atenção. Karik atu halo Orçamento Retificativo, bele haree mós, karik sira-nia programa ka sira-nia orçamento ne'e sira la usa, bele usa filafali ba programa foun ne'ebé IX Governo tau ona iha plano.

Segundo, ha'u haree mós iha execução CLN nian, Centro Logística Nacional, ne'ebé tau osan ho milhão 8,4, maibé foin executa de'it 7%. Ita haree katak iha ita-nia população barak mak afetado ou sofre hela ba menos de ai-han iha mercado, e preço mós barak mak sa'e, karik iha orçamento sira-ne'e bele usa, tanba ne'e ita haree katak iha situação ne'ebé urgente.

Ha'u acompanha mós iha mídia, iha companhia balu ne'ebé iha hela, ita bele dehan liafuan ne'ebé la hanesan ho ita-nia AIFAESA (Autoridade de Inspeção e Fiscalização da Atividade Económica, Sanitária e Alimentar), liuliu kona-ba foos ne'ebé ho marca Vitoria, se ha'u la sala, dehan katak foos ida-ne'e ho qualidade la di'ak, ne'ebé companhia mós ameaça atu lori AIFAESA ba Tribunal. Então, ha'u husu ba Governo foun ida-ne'e atu tau questão mós ba assunto ida-ne'e, liuliu ba foos ne'ebé agora daudauk la'o hela iha mercado. Ha'u husu favor.

Ita-nia membro Governo foun mós hatete katak ita iha problema tanba ita la iha laboratório atu halo teste ba sasán sira-ne'e, ne'ebe, ami-nia expectativa ne'e Governo foun bele tau mós atenção se ita bele halo ita-nia laboratório ida para bele halo teste ba ita-nia hahán sira-ne'e. Ita lakohi ita-nia consumidor sira sofre ba hahán ne'ebé liu ona prazo.

Mak ne'e de'it, ha'u-nia tempo mós hotu ona, obrigada barak.

Sr.^a **Presidente**: — Obrigada, Sr.^a Deputada.

Tuirmai, sei falta rua: ida mak Sr.^a Deputada Aliança, ida seluk Deputado «Deker». Mas, ha'u fó ba Sr.^a Deputada Aliança, halo favor, cinco minutos.

Sr.^a **Aliança da Conceição Araújo** (CNRT): — Obrigada ba Sr.^a Presidente Parlamento Nacional.

Muito bom dia a todos, incluindo o Sr. Vice-Ministro de Assuntos Parlamentares ne'ebé ohin mai iha ami-nia leet.

Ha'u-nia intervenção sobre de'it buat rua: preço mercado nian ne'ebé ita hatene katak folin sa'e hela de'it, sa'e hela de'it. Ne'ebe, ha'u hameno hela ba Sr. Vice-Ministro atu hato'o hela, hanesan iha programa Governo nian, se bele karik ha'u fó hanoin hela para atu tau tabela de preços ida hodi hanesan. Loja ida-ne'e se fa'an buat ne'e hanesan ne'e, ida seluk mós tem que hanesan ne'e, ne'e para ita labele saida.

Segundo, iha ita-nia Constituição, artigo 13.º, ne'ebé ita aprova tiha ona iha uluk kona-ba línguas, línguas ita iha rua, português ho tétum, línguas oficiais mak rua ne'e! Ha'u aprecia tebetebes ho ita-nia intervenção sira-ne'e ho tetun, tetun, tetun de'it, se bele karik ita aumenta tan português de vez em quando, ne'e para ita bele pratica língua portuguesa, tanba ida-ne'e mós iha hotu ita-nia Constituição hanesan língua oficial. Sira-ne'ebé la bele, labele hirus, labele chateado, tanba ita moris mai la'ós matenek kedas. Ita tem que pratica para bele apreende ema nia lian, tanba ida-ne'e mós ita hakerek tiha ona iha ita-nia Constituição.

Iha mós, ha'u fó-hanoin ba Ita-Boot atu fó-hatene mós ba Governo, ba ministério competente, tanba dala barak ha'u haree iha televisão sira-ne'e, professor sira-ne'e ou agentes docentes, sira quando halo sira-nia intervenção ne'e português ladún ida. Tanbasá mak sira la treina se educação iha sira-nia liman? Educação ho mós instrução iha sira-nia liman. Sira tem que fó mós exemplo di'ak ida ba ema, ba população ne'e, para apreende, pratica língua, la'ós de'it ba português maibé tetun hotu.

E mós ida - la hatene, ha'u bele ko'alia iha-ne'e ka lae, mas no entanto ha'u ko'alia tanba ha'u sente ladún di'ak - dala barak ita rona ema, ita balu mós hatete: «Oi, agora Governo Maun Xanana nian ida-ne'e kala ikus ona mak ne'e, tanba nia idade ona. Di'ak liu ita aproveita.». Tanbasá mak ita aproveita? Ita sira ko'alia ne'e mós la hatene bainhira mak ita mate. Ne'ebe, husik bá, ita reza tan ba

Maromak fó tan força ba Maun Boot Xanana. La'ós ha'u ko'alia de'it ba nia, lae! Ha'u ko'alia mós ba ita-nian maun sira seluk. Ne'ebe, diminui uitoan liafuan sira-ne'e bá! Ida mai «Hei, agora ita tem que ser, agora hanesan ne'e, cinco anos ne'e nia sei to'o iha ne'ebá ka lae?» Resta saber, ida ko'alia ne'e, nia mak atu la to'o karik. Ne'ebe, ita cuidado ho liafuan sira-ne'e. Calma, ita hanoin ba Maromak leten, «Hai tebes, ha'u-nia vida sei to'o ida ne'e ka lae, sei to'o ida-ne'e ka lae?» Lalika soe-lia ba ha'u-nia Maun Boot, Maun Boot Maromak sei ajuda nia nafatin, fó força nafatin, tanba ita hotu sei precisa nia.

Mak ida-ne'e de'it, Sr.^a Presidente, obrigada.

Sr.^a **Presidente**: — Tuirmai, ikusliu, Deputado interveniente, Sr. Deputado «Deker», cinco minutos.

Sr. **Domingos Augusto «Deker»** (CNRT): — Obrigado ba oportunidade.

Respeito ba Sua Excelência Presidente Parlamento Nacional, respeito mós ba Vice-Ministro Assuntos Parlamentares ne'ebé marca presença iha-ne'e, distinta no distinto Deputado sira hotu mak ha'u respeito, no ba rona-na'in sira hotu iha território Timor-Leste.

Iha biban ida-ne'e ha'u hakarak secunda de'it problema barak ne'ebé representante povo nian iha Uma-Fukun ne'e foti. Tuir ha'u katak ne'e pertinente tebetebes, tanba realidade ne'ebé ohin loron acontece iha ita-nian rain mak ida-ne'e. Liuliu, primeiro, liga ba estrutura IX Governo Constitucional ne'ebé barak liu mai husi jovem. Ne'e claro, ne'e mós realidade ida.

Nu'udar representante povo, ita iha Uma-Fukun ida-ne'e, atu bancada Governo ka bancada oposição, ita hotu iha dever e moral atu observa, atu fiscaliza, hodi fó nafatin apoio ba sira atubele sucesso iha sira-nia knaar. Maibé, problema, realidade maka ohin quase que ita barak consciente katak Governo iha ona, maibé ninia Programa de'it seidauk submete mai. Tanba ne'e, atu bele ka la bele, la'ós ha'u ata atu halo defesa iha-ne'e, ita ema sei la halo milagre. Sai hanesan sasukat ba promessas IX Governo Constitucional nian ne'ebé ita-nian Maun Boot rassik fó-sai liuhosi ninia discurso político katak 120 dias primeiro nu'udar tempo, nu'udar sasukat, ba governante ida-idak nia capacidade, ne'ebe, dever moral, ita hotu iha obrigação atu acompanha.

Tuir ida-ne'e, ha'u apenas atu secunda de'it questão, ne'ebé horisehik ha'u husu mas ha'u atrasa uitoan, ne'ebe ha'u la hetan oportunidade, questão ne'ebé importante tebes no todan tebes hela ba ita nu'udar representante povo iha Uma Fukun ida-ne'e, kona-ba ita-nia mártir sira-nia restos mortais, ne'ebé distinto Deputado «Mandati» foti, e ha'u hakarak secunda ida-ne'e. Atu lembra nafatin ba ita hotu iha Uma-Fukun ida-ne'e hodi assume responsabilidade, fó hanoin beibeik ba IX Governo Constitucional oinsá mak ita bele hetan solução ba sira-nia situação. Tanba realidade família sira hein

ho laran moras, ho triste, to’o ona tinan 20 resin, ita-nia aproximação ba Estado Indonésia atu hatene tuir sira-nia paradeiro sai hanesan problema ida que importante tebes iha ita-nia mandato.

Tuir tan ida-ne’e, questão ne’ebé dala barak ema haree la hetan e nunca tau iha consideração, lixo! Buat ne’ebé ki’ik liu, maibé ema nunca consciente katak estraga hela nação ida-ne’e nia imagem iha mundo, tanba sai hanesan nação, ita-nia odamatan nakloke ba mundo tomak atu mai iha ita-nia Rain. Tuir ha’u-nia hanoin, atubele reduz problema kona-ba lixo, primeiro, tem que cria regra ida ne’ebé rígida atu obriga comunidade tomak prepara sira-nia lixo-fatin ne’ebé mak seguro, ne’e hakarak ka lakohi! Ha’u observa, besik ha’u-nia hela-fatin, iha ha’u-nia bairro rasik, tanba Governo la cria regra ne’ebé adequado, então comunidade falun lixo iha plástico e soe filafali iha ema seluk nia uma oin. Ne’e imagem ne’ebé loloos la podia acontece.

Segundo, ha’u husu, liuliu ba companhia ne’ebé manán *tender* kona-ba lixo, tem que apresenta condições, liuliu viaturas. Viaturas ne’ebé sira usa tem que preenche *kriteria*. Ha’u haree experiência iha rai seluk, ema nia viatura ne’e automático, la’ós viatura ida mai nakloke an, depois mai pára, soe lixo, até ema nia *gerobak* sira ho lixo-fatin sira mós tula hotu...

Sr.^a **Presidente**: — Obrigada, Sr. Deputado.

Sr. **Domingos Augusto «Deker»** (CNRT): — Ne’e la di’ak! Funcionário sira-ne’ebé recruta hamoos, sira-ne’ebé saneamento dasa fo’er la hanesan ema dasa fo’er iha uma, matan hateke sa’e loron leten e depois maka ain ho ai-saar book de’it...

Sr.^a **Presidente**: — Sr. Deputado, conclui!

Sr. **Domingos Augusto** (CNRT): — Sim! Sasán sira-ne’e mak precisa iha-ne’e ita tau. E husu mós apoio ativo husi funcionário público sira, atu nune’e ita bele reduz lixo iha ita-nia rai laran, selae buat ne’ebé ki’ik liu, maibé ita la sente katak afeta daudauk ita-nia imagem iha mundo.

Ha’u hanoin, ba ohin loron mak ne’e de’it.

Obrigado ba oportunidade.

Sr.^a **Presidente**: — Srs. Deputados, ba intervenção ita remata. Maibé sei iha perguntas, bele halo por escrito, Regimento fó dalan. Ne’ebe, ha’u lakohi atu taka microfone, mas por favor, tanba ita dada naruk.

Molok atu fó Sr. Vice-Ministro, ha’u iha assunto haat que sai atenção ita hotu nian: ida, foti husi Sr.^a Deputada Cristina Rebelo, salário dos professores contratados desde abril. É estranho, Sr.^a Deputada, osan mak la iha? Se salário, deve estar ali, sim Senhora. Tanbasá la executa? É trabalho da

Comissão Especializada Permanente chamar o membro do Governo para explicar. Mesmo que nia foun, maibé nia diretor balu iha-ne'ebá, ha'u hanoin, sira-ne'ebé memória institucional tem que hatán, tanba execução, hanesan ohin Deputada Cedelízia hato'ó, vinte e tal porcento. Meu Deus!

Ida seluk fali, ha'u preocupa mak, Sr.^a Deputada Cristina, tanba ita-nia OGE tau tiha ona osan, tanba la selu ba ne'ebá, bele transfere ba programa seluk, *I don't know!* Tanba 100% bele halo transferência. Transferência é o mais fácil, hasai tiha sistema zero, zero, Parlamento mós la controla. Ne'e problema ida que ita tem que haree, a Lei Enquadramento.

A Sr.^a Deputada Angelina Sarmiento, ohin recrutamento la'ós ita foti iha li'ur. Ha'u hanoin, Sr.^a Deputada iha V Legislatura lembra, iha relatório Comissão da Função Pública hatete «recrutamento descontrolado». Ha'u husu iha-ne'e, mas sira dehan: «Ami fó-hanoin de'it, maibé ami la bele *take action*». *Tidak benar!* Estatuto da Comissão da Função Pública, sira mak tem que tau matan ba ida-ne'e. Ne'ebe, ida-ne'ebé mak halo loos, sala, ha'u lakohi buka. Papel das comissões, fiscaliza! Câmara de Contas mós hato'ó iha Conta Geral 2021 katak recrutamento excessivo do pessoal contratado, inclui assessores. Ne'e para ita lê filafali relatório ne'e.

E depois a Deputada Aliança, controla preço, ita la bele, tanba ita adota mercado livre, a não ser quer o Governo intervém para estabiliza preços.

Deputado «Deker», sobre ita-nia veterano sira-ne'ebé mate, lakon, ita iha grupo de amizade ho Indonésia, ne'ebe ha'u hanoin através papel parlamentar, hanesan diplomata, bá ko'alia bá hodi bele ajuda dudu.

Ha'u ohin haluha, sorte que técnico sira hato'ó, iha declaração da bancada, talvez, a última palavra do Sr. Deputado, molok ha'u fó ba Sr. Vice-Ministro.

Halo favor, Sr. Deputado.

Sr. **António Verdial de Sousa** (KHUNTO): — Muito obrigado, Sr.^a Presidente.

Ohin ha'u rona Maun Mandati mak ko'alia kona-ba direito propriedade privada, iha-ne'e ha'u hatete katak iha artigo 54.^o ne'e claro tebetebes, descreve iha-ne'ebá. E ha'u agradece tanba iha distinto Deputado ida mak hakarak lê. Iha-ne'ebá hatete katak «Só os cidadãos nacionais é que têm direito à propriedade privada da terra», *Bahasa* karik dehan *hanya warga negara yang berhak atas kepemilikan pribadi atas tanah*.

Excelência Presidente, caros colegas distintas no distintos Deputados, ha'u agradece tanba ohin Presidente Parlamento hatete katak esta é a responsabilidade da Comissão A. Sim, ida-ne'e desde uluk ha'u-nia mehi, tanba tuir loloos Comissão A la'ós halo lei de'it, maibé tem que halo fiscalização direta ba atos no atitude governativa. E ha'u liga ba assunto ida-ne'e, hanesan objeto ida ne'ebé uluk iha Indonésia nian, nia fa'an tiha ona, depois ita alcança ita-nia objetivo ukun-rasik an mai, iha cidadão ne'ebé uluk fa'an, nia apodera filafali objeto ne'e, depois nia fa'an filafali no fa'an filafali, no fa'an

filafali! Objeto hirak-ne'e iha Município Díli. Ha'u atu hatete katak ha'u ema ne'ebé mak serviço kleur iha área agrária nian, la'ós de'it iha Município Díli, maibé hanesan ex-chefe ba técnico lei nian iha KANWIL (*Kantor Wilayah*) BPN (*Badan Partanahan Nasional*) a nível território nacional, ha'u compreende uitoan, la hotu, tanba ha'u lakohi gava an dehan ha'u hatene hotu, maibé ha'u hatene katak técnicos profissionais cadastral nian iha área agrária nian ne'ebé agora daudaun sei serbisu hela iha-ne'ebá. Ne'ebe, ha'u atu hatete hanesan ne'e: Sr. Vice-Ministro ne'ebé trata assunto parlamentar, ha'u tatoli hela mensagem, karik Governo, especialmente ba entidade governativa ne'ebé trata assunto rai no propriedade, se precisa ami-nia apoio atu suporta no hanoin murak iha perspetiva técnica administrativa no tático operacional, estou pronto para dar o meu apoio máximo hanesan ema ne'ebé serviço iha área ne'e kleur. Ha'u foti exemplo simples, iha buat ida mak ha'u haluha tiha, desculpa Sr.^a Presidente, ha'u hatete uitoan lai, iha buat ida mak ha'u haluha tiha, hanesan Deputado maun Óscar mak ne'e, iha momento ne'ebá ha'u husu atu apresenta ninia rico-soin ne'ebé iha Díli laran, especialmente ba iha *perumahan* Surikmas *satu, dua, tiga*, maibé ha'u hatete: apresenta ho documento ne'ebé comprova katak fatin ne'e maun nian duni...

Sr.^a **Presidente**: — Obrigado, Sr. Deputado.

Sr. **António Verdial de Sousa** (KHUNTO): — Ne'e duni iha dalan atu ita resolve questão sira-ne'e.

Muito obrigado, Sr.^a Presidente.

Sr.^a **Presidente**: — Ita-Boot bele hanoin ita halo seminário ida kona-ba Lei Rai...

Sr.^a *Presidente hatudu sinal positivo ho liman fuan inan ba leten.*

Está bem? Para ita bele ko'alia a vontade iha-ne'ebá ho intervenção.

Ikusliu, ha'u sei fó ba intervenção do Sr. Vice-Ministro dos Assuntos Parlamentares. Faz favor.

Sr. **Vice-Ministro dos Assuntos Parlamentares** (Adérito Hugo da Costa): — Excelentíssima Sr.^a Presidente Parlamento Nacional, obrigado barak ba tempo ne'ebé fó mai ha'u.

Excelências membro da Mesa Parlamento Nacional, distinto e distinta Deputada sira hotu, ha'u-nia presença ohin iha-ne'e emocional uitoan, tanba 16 anos ha'u iha-ne'e, mas ha'u-nia emoção ne'e reduz tiha kedas, lakon kedas, quando gesto de receção ne'ebé Sr. Deputado sira hotu expressa mai ha'u-nia presença ohin. Agradece tebetebes e conta ho Excelência sira hotu ba ita-nia mandato ne'ebé povo fó ba próximo cinco anos.

Antes ha'u hato'ó resposta ruma liga ho intervenção sira-ne'ebé fó, ha'u hakarak hato'ó katak ha'u foin mai marca presença iha sessão plenária ohin, maibé coincidente ho ohin halo deliberação ida ba completa grupo de trabalho Parlamento Nacional nian ne'ebé ita bele dehan katak hahú ohin entrada em funcionamento normal Parlamento Nacional nian ho leitura ba mesa Comissão A nian. Então, la tarde ha'u-nia presença quando ha'u halo hela serviço iha IX Governo Constitucional em relação ho IX Governo Constitucional nia Programa, atu adianta tiha kedas katak programa quase iha fase final e mais cedo lokraik ne'e sei submete mai Parlamento Nacional.

Segundo, tanba ne'e hahú ita-nia Sessão Legislativa primeira, então ha'u hakarak introduz ba Sr. Deputado sira hotu katak serviço ida apoio Parlamento Nacional ne'ebé liga, sai fonte entre Executivo ho Parlamento, hala'ó desde governação anterior e ho equipa ida consistentemente nunca husik Plenária ne'e quando membro Governo sira la iha presença, desde Plenária to'ó conferência de líderes das bancadas. Se Sr. Deputado sira autoriza, liuliu Sr.^a Presidente Parlamento, ha'u hakarak introduz de'it equipa, ami bolu Gabinete Apoio Parlamentar, ne'ebé consistentemente iha-ne'e, lidera husi Sr. Paulino Quintas, halo favor bele hamriik, ho ninia equipa Sr.^a Cármen, Sr.^a Elsa ho nia equipa tomak.

Basa liman husi Deputado sira.

Distinto Deputado sira hotu equipa ida serviço besik tebetebes iha portão principal entrada mai salão Uma-Fukun ida-ne'e, que sira nunca husik Ita-Boot sira-nia pedido, sugestões, perguntas, ne'ebé halo iha Uma-Fukun ne'e liga ho Executivo nia serviço.

Hakarak adianta mós katak semana rua última, intervenções Sr. Deputado sira hotu nian, sira halo ona, ami halo ona primeiro andamento ba linha ministerial sira-ne'ebé relevante ho assunto sira-ne'ebé foti iha última Plenária to'ó dia 4.

Hanesan Sr. Deputado sira hotu hatene, Sr.^a Presidente Parlamento Nacional, IX Governo Constitucional comprometido desde tomada de posse atu hala'ó nia knaar no transforma visão política ba próximo cinco anos ne'ebé sei elabora hotu iha Programa IX Governo, ne'ebé sei submete mai Parlamento iha tempo badak.

Hahú kedas husi questão ne'ebé Sr. Deputado António Verdial foti kona-ba política cadastro no terras nian, ne'ebé transforma iha visão ida concreta ho ambicioso, ha'u lalika adianta concreta saída, política cadastro nacional ne'ebé sei continua, fó andamento ba desenvolvimento economia nação nian tanba ita hotu hatene, estatuto rai nian sai importante ba próprio ita-nia povo, cidadão nacional, no mós sai assunto ida importante atu atrai investidor sira para sente seguro quando sira investe iha ita-nia rain. Tan ne'e mak ami regista ho di'ak tebetebes declaração política Bancada

KHUNTO nian, ne'ebé secunda mós husi Sr. Deputado Mandati. Obrigado ba hotu-hotu ninia contribuição, ba importância política cadastro nacional ne'ebé tem que halo andamento ba oin.

Ha'u la fó resposta ida-ida, mas ha'u hakarak halo de'it resumo ba cada questão ne'ebé Sr. Deputado no Sr.^a Deputada sira mós foti ba assunto sira-ne'ebé ha'u regista e técnico sira mós regista, sei halo andamento ba linha ministerial sira-ne'ebé relevante ho assunto ne'ebé ita foti.

Sr. Deputado sira hotu, assunto ida imediata que Governo ida-ne'e enfrenta desde posse iha dia 1 de julho maka impacto husi calamidade ka desastres naturais ne'ebé acontece. Mesmo IX Governo seidauk iha fase ida execução de mandato tecnicamente, maibé la iha impedimento ida concreta quando Governo enfrenta situação ida liga ho calamidade semana liubá. Mesmo concentra hela ba desenha visão política ne'ebé transforma ba Programa IX Governo Constitucional, liuhossi Ministério Interior serbisu ho Autoridade Proteção Civil, imediata, Ministério Solidariedade Social em coordenação imediata ho Autoridade Proteção Civil iha nível município, - ohin agradece tebes Sr.^a Deputada ida menciona sobre envolvimento autoridade local município sira ba halo atuação imediata em coordenação ho linha ministerial e nacional - tan ne'e mak la iha impedimento ida substancial liga ho serviço ba halo atendimento imediata sira-ne'ebé halo husi IX Governo Constitucional em coordenação ho sistema proteção civil ne'ebé ita estabelece tiha ona. E atu aproveita hatete mós, adianta de'it ba Sr. Deputado sira, liga ho política ba enfrenta desastres naturais ho calamidade sira, transforma mós ho didi'ak iha Programa IX Governo Constitucional. Ha'u espera, orsida documento ne'e to'o, Sr. Deputado sira bele haree visão concreta IX Governo Constitucional nian iha próximo cinco anos atu tau atenção ba questão no proteção e segurança ba ita-nia povo quando liga ho questão no calamidade ou desastre sira-ne'ebé iha.

Questão hapára funcionário, Sr. Deputado sira hotu, ha'u compreende ho didi'ak, ami iha IX Governo Constitucional compreende ho didi'ak importância atu haree questão ida ita enfrenta agora. Rácio funcionário permanente versos funcionários casuais demasiado, e cria hela *gap* ida ba ita, trabalho de casa ida sério tebetebes ba ita atu resolve. Iha Ministério balu, ha'u la temi hotu-hotu, - número ne'ebé ha'u temi orsida la'ós número exato, mas hakarak halo comparação de'it - funcionário permanente 100 pessoas, funcionário categoria casuais 200 pessoas. Rácio ne'e iha ne'ebé?

Ohin ko'alia mós kona-ba papel Comissão Função Pública, to'o agora saida mak Comissão Função Pública halo? Saida mak função inspetor sira halo iha cada linha ministerial liga ho política recrutamento, aumenta funcionário publico? Saida mak inspetor sira halo? Saida mak recurso humano sira halo iha cada divisão, cada unidade sira halo em relação ho política sira mai atu halo aumento de número do funcionário público liuhosi ida casuais ne'e? Nu'usá mak la tau atenção ba recrutamento ne'ebé liga ho carreira profissional função pública nian? E ita husik loos ida-ne'e, abandona totalmente, ha'u bele dehan. Ho estatística, comparação ne'ebé ha'u dehan ohin, ha'u fó de'it ba Sr. Deputado sira atu ita hotu halo reflexão ida concreta, ideal, ba futuro ita-nia função pública. Quando

ita iha tendência aumenta número funcionário contratado ka casuais, ita abandona funcionário permanente, ne'ebé sira dedica ona sira-nia an cinco anos, 10 anos, 15 anos, 20 anos e sira la bele iha espaço atu iha aumento de *level* ba sira-nia carreira. Tanba saida? Ita iha tendência la haree ba sira e iha tendência ho casuais. Até funcionários casuais contratados barak liu mak preenche cargo chefia do que funcionário permanente. Trabalho de casa, Sr. Deputado sira, ha'u ko'alia ho emocional uitoan ba situação atual ne'ebé nação enfrenta, Estado enfrenta. La iha questão ódio e vingança, iha de'it saida mak ita hakarak haree ho cuidado ba timoroan feto-mane ne'ebé hetan oportunidade sai funcionário público. Karik mós hetan oportunidade sai funcionário contratado, maibé tem que haree sira ho didi'ak, ho cuidado, la'ós questão ódio e vingança.

Iha ministério balu, departamento balu, funcionário la iha cadeira atu tuur, depende dadeer 8h00 sé mak to'o uluk, nia tuur iha cadeira, sé mak to'o tarde, nia hamriik to'o meio-dia ou bá buka tatiis sira, tuur fuma cigarro ou halo atividade seluk. Situação atual acontece iha instituição Estado nian. La'ós tempo ita dun malu, vingança, ódio, mas ha'u sente tempo atu halo reflexão ida concreta. Ha'u conta ho bancada parlamentar sira hotu, comissão especializada sira hotu, atu ita haree questão ida-ne'e ba oin.

Assunto restos mortais, Sr. Deputado «Mandati», Sr. Deputado «Deker», expressa situação ida que depois ita sei haree iha Programa IX Governo sei apresenta mai ko'alia kona-ba oinsá tratamento digno no correta ba arruma restos mortais atual ne'ebé balu voluntariamente coleta hela maibé seidauk tau iha fatin ida digno, inclui mós restos mortais ne'ebé família sira hein hela.

Então, em relação ho assunto ida-ne'e, restos mortais, ita sei haree iha política externa ne'ebé transforma iha IX Governo nia programa para depois ita desenvolve ita-nia relação amizade contínua ho país vizinho para depois ita bele orienta ba possibilidade arruma restos mortais ne'ebé ita hotu espera, liuliu família sira-ne'ebé iha.

Sr. Deputado sira hotu, Sr.^a Presidente do Parlamento, assunto ida seluk liga ho importância ba protege ita-nia direito consumidor.

Sr.^a Deputada Cedélizia ohin foti assunto ida-ne'e, então ha'u liga kedas, ne'e la'ós questão laboratório. Ita precisa necessidades atu iha laboratório ida digno, *standard*, para haree questão importação ba hahán no mós ai-moruk ne'ebé ema hetan licença livremente bá loke farmácia. Iha farmácia balu ai-moruk nem hakerek ho lian português, nem inglês, mós ita hetan autorização mai fa'an iha ita-nia sociedade, então precisa iha atenção ida sério tebetebes e Governo tau iha ninia programa IX Governo ninian atu haree questão ida-ne'e para fó proteção séria e imediata ba questão direito consumidor. Tanba lei direito consumidores nian mós em vigor, iha tempo ona atu completa legislação sira ba lei proteção consumidores.

Programa, Sr.^a Presidente Parlamento, ha'u atu adianta katak mais cedo orsida, antes 5h00, documento Programa IX Governo nian sei submete mai iha Parlamento Nacional. Versão *hard copy*

ba Sr. Deputado sira 65, mós ami iha versão eletrónica ne'ebé ho limita *USB* bá de'it Presidente bancada sira depois mak cópia ba membro sira hotu.

Imediata, depois programa ami entrega, ami espera agenda husi Mesa Parlamento Nacional ho calendário tentativa segunda-feira. Hanoin katak de acordo ho Regimento, depois de submissão, Parlamento iha cinco dias antes agenda ne'ebé ami calcula ona ba possibilidade segunda-feira dia 17.

Então, ida-ne'e mak ami hato'o, Sr. Deputado sira hotu, Sr.^a Presidente do Parlamento Nacional, assunto sira seluk ne'ebé ha'u la temi concreta ida-idak, ami regista ho cuidado sem haluha liafuan ida, termos ruma, depois atu halo andamento ba linha ministerial sira hodi fó resposta ba distinto Deputado sira-nia preocupação.

Questão ida seluk, desculpa, antes de ha'u termina, assunto ida Sr.^a Deputada Angelina hato'o, kona-ba troço estrada Laga ba Baguia no mós Quelicai, ha'u sente, termo linguagem ne'ebé membro Governo sira usa karik tendência atu interpreta katak ne'e atu abandona, mas lae! Politicamente iha hela condição balu que IX Governo halo avaliação ba processo sira *tenderização*, processo sira-ne'ebé halo, tanba iha indicação ne'ebé ita haree katak depois de halo contrato, lançamento, companhia ne'ebé implementa ne'e halo bosobosok de'it, halo uitoan-uitoan de'it depois husik hela, halo uitoan mosu fali, halo uitoan mosu fali. Ne'e mak termos de linguagem ne'ebé usa dehan katak loloos ne'e mak ne'e atu reavalia ba compromisso sira halo, liga ho questão aprovisionamento, capacidade companhia ne'ebé halo implementação. Sr. Deputado sira-ne'ebé desde 2007 iha-ne'e karik lembra hela, Governo central tau atenção desde Governo sira uluk ba questão troço ida liga Laga ho Baguia ho Quelicai, ho ida-idak ninian situação, condição ba implementação. Tan ne'e mak Governo ida-ne'e sei cuidado tebetebes ba qualquer andamento ba obra sira, liuliu liga ho construção ninian atu tau atenção, liuliu participação setor privado sira para depois halo andamento, se nia manán karik estrada ida-ne'e nia tem que iha capacidade suficiente para depois atu halo implementação.

Obrigado barak, Sr.^a Presidente, Sr. Deputado sira hotu, ba tempo ne'ebé iha.

Sr.^a **Presidente:** — Sr. Vice-Ministro, sei iha tempo para responde por escrito, e Srs. Deputados, ita *break* ba *snack*. Ha'u husu desculpa, tuir loloos 11h00, mas ohin ita iha assuntos importantes. Ita *break* 15 minutos e ita filafali mai para halo ita-nia votação de'it tanba regras mak haruka be ita halo votação ba eleição do Grupo Nacional Assembleia Parlamentar tanba urgente, dentro em breve iha convites mai ona be ita tem que preenche.

Muito obrigado. 15 minutos ita filafali mai para uma hora ita ida-idak bá almoço e halo halo serviço seluk.

Obrigado.

Pausa

Sr.^a **Presidente**: — Para ita continua. Assim uma hora ita bele remata ita-nia atividade, está bem? Tanba votação de'it, tanba regras maka husu ita atu halo atividade ida-ne'e. Ne'ebe, halo favor tuur, Srs. Deputados.

Srs. Deputados, dala ida tan, ho respeito ha'u husu ba Ita-Boot sira atu hola fatin para ami bele verifica quórum. Halo favor tanba tempo la'ó daudaun, orsida to'ó tuku ida ita dehan hamlaha. Halo favor.

Srs. Deputados, tanba iha quórum de funcionamento, ha'u husu ba Sr.^a Secretária atu lê decisão ita-nian ou membros ne'ebé ita indica ba Assembleia Parlamentar da Comunidade dos Países de Língua Portuguesa. Halo favor.

Sr.^a **Secretária da Mesa** (Virgínia Ana Belo): — Obrigada, Sr.^a Presidente, boa tarde ba ita hotu.

«Eleição dos membros do Grupo Nacional à Assembleia Parlamentar da Comunidade dos Países de Língua Portuguesa.

Bancada CNRT apresenta Deputados na'in-haat nu'udar membro efetivo no na'in-haat hanesan membro suplente: Primeiro, Maria Terezinha da Silva Viegas, efetivo; Deputado Albino da Silva, efetivo; Deputada Sancha Margarida Tilman, efetivo; Deputada Cedelízia Faria dos Santos, efetivo; Deputada Virgínia Ana Belo, suplente; Deputada Aliança da Conceição Araújo, suplente; Deputado Marcos Xavier, suplente; e Deputado Armando dos Santos Lopes, suplente.

Bancada FRETILIN, iha Deputados efetivos na'in-rua ho suplente na'in-rua: Ida, Deputado David Dias Mandati Ximenes, efetivo; Deputada Nurima Ribeiro Alkatiri, efetiva; Deputada Helena Martins Belo, suplente; e Deputado Óscar Lima, suplente».

Obrigada, Sr.^a Presidente.

Sr.^a **Presidente**: — Tanba proporcionalidade, as negociações podem se fazer dentro das bancadas que quiserem fazer, ne'e prática que ita halo. Ha'u la hatene Sr. Presidente da Bancada do CNRT ho Presidente da Bancada da FRETILIN querem fazer alguma intervenção para hanesan ohin halo iha AIPA (*ASEAN Interparliamentary Assembly*) ninian, se não estou em erro, para ita la bele avança tiha mak ita foin coloca ne'e. Selae ita bá votação. O que que a gente prefere?

Faz favor, ha'u fó uluk ba Sr. Presidente da Bancada do CNRT. Tem alguma palavra para pronunciar sobre ita-nia composição ne'e? Tanba proporcional, ne'ebé bancada boot rua ne'e de'it, maibé iha bancadas que fazem parte do grupo, ita bele fó hanesan uluk, ita fó ba PLP e FRETILIN fó ba PD. Agora quer ou não, se bele decide para ami haree naran sira-ne'e ita bele... ha'u haluha tiha atu hato'ó para halo negociações com as parcerias que quiserem. Ne'ebe, Sr. Presidente Duarte Nunes, halo favor, palavra ita-nian.

Sr. **Duarte Nunes** (CNRT): — Obrigado, Sr.^a Presidente.

Boa tarde ba ita hotu.

Se ha'u la sala, iha ami-nia composição ne'e iha fatin ruma ba Deputado sira husi Bancada PD karik, se ha'u la sala. Ha'u haree, inclui ona. Ne'ebe, natoon ne'e, iha discussão ne'e bancada rua ne'e mak iha discussão, iha intenção atu oferece fatin ba colega sira-ne'ebé hakarak bá iha-ne'ebá. Maibé ha'u la hatene, karik seluk iha comentário ruma, ita bele rona para depois ita halo tuir.

Obrigado.

Sr.^a **Presidente**: — Tanba ohin ha'u la haree, CNRT ho PD iha ona Sr.^a Sancha Tilman ho Sr. Armando dos Santos, enquanto que husi FRETILIN nian la iha. Ne'ebe, ha'u soe fali ba Presidente da Bancada ou já não quer ... deixa falar...

Protesto husi Deputado balu.

... deixa falar! Ha'u fó ba Presidente da Bancada lai. Se la iha pronuncia buat ruma, la iha buat ida, vamos à votação. Faz favor.

Sr. **Aniceto Longuinhos Guterres Lopes** (FRETILIN): — Obrigado, Sr.^a Presidente.

Distintos Deputados, ba grupo nacional ida-ne'e FRETILIN iha rua de'it be ami la *share* ba bancada seluk ona, tanto efetivo assim também suplente. Tanba ne'e, ami husu ita procede ba votação, Sr.^a Presidente.

Sr.^a **Presidente**: — Ho nune'e, obrigado ba Ita-Boot sira-nia intervenções e ita procede ba votação e ha'u fó tempo ba técnicos hodi haree urnas no mós Sr.^a Secretária... Ha'u hanoin, ha'u sei la halo educação cívica. Fofoun está certo, mas agora vamos à votação e a Sr.^a Secretária faça a chamada dos Deputados para exercer as suas funções. Mas, técnico hatudu lai urna ne'e. Halo favor.

Técnico husi DIPLIN hi'it urna hodi hatudu Deputado sira.

Sr.^a Deputada Maria Barreto, ohin ha'u fó oportunidade Ita-Boot sira la intervém, agora atu intervém atu bá votação? Ha'u hanoin lae karik. Concordância iha ona bancada, ne'ebé ha'u husu desculpa ha'u la fó tan ona intervenção.

Muito obrigada.

Sr.^a Secretária, ha'u fó oportunidade ba Ita-Boot atu bolu.

Sr.^a **Secretária da Mesa** (Virgínia Ana Belo): — Obrigada, Sr.^a Presidente.

Deputada Maria Fernanda Lay (CNRT).

Deputada Maria Terezinha da Silva Viegas (CNRT).

Deputado Alexandrino Afonso Nunes (CNRT).

Deputada Virgínia Ana Belo (CNRT).

Deputada Maria Teresa da Silva Gusmão (CNRT).

Deputada Bendita Moniz Magno (CNRT).

Deputado Domingos Augusto «Deker» (CNRT).

Deputada Lúcia Taeki (CNRT).

Deputado Duarte Nunes (CNRT)

Deputado Marcos Soares Martins (CNRT).

Deputado José Virgílio Rodrigues Ferreira (CNRT).

Deputado Luís Ximenes Caldeira (CNRT).

Deputada Maria Rosa Câmara «Bisoi» (CNRT).

Deputado Leandro Lobato (CNRT).

Deputado Marcos Xavier (CNRT).

Deputado Óscar de Araújo (CNRT).

Deputado Firmínio Taeque (CNRT).

Deputada Veneranda Lemos Martins (CNRT).

Deputado Natalino dos Santos Nascimento (CNRT).

Deputado Romeu Moisés (CNRT).

Deputado Gabriel Soares (CNRT).

Deputado Saul Salvador Amaral (CNRT).

Deputada Maria Gorumali Barreto (CNRT).

Deputado Patrocínio Fernandes dos Reis (CNRT).

Deputado Virgílio Pereira (CNRT).

Deputada Cedelízia Faria dos Santos (CNRT).

Deputado Francisco da Costa «Ikulay» (CNRT).

Deputado Albino da Silva (CNRT).

Deputada Carminda Carlota (CNRT).

Deputado Ricardo Baptista (CNRT).

Deputado Anacleto Freitas (CNRT).

Deputada Aliança da Conceição Araújo (CNRT).

Deputado Mateus da Cruz de Carvalho (CNRT).

Deputado Armando dos Santos Lopes (CNRT).

Deputado António da Conceição «Kaloan» (PD).
Deputado Manuel Henrique Noronha (PD).
Deputada Sancha Margarida Tilman (PD).
Deputado Antoninho Doutel Sarmiento (FRETILIN).
Deputada Sância Florência Paixão Bano (FRETILIN).
Deputada Maria Angélica Rangel (FRETILIN) — «ausente».
Deputado Dário Madeira (FRETILIN).
Deputado Aniceto Longuinhos Guterres Lopes (FRETILIN).
Deputado Lídia Norberta dos Santos Martins (FRETILIN).
Deputado Antoninho Bianco (FRETILIN).
Deputado David Dias Ximenes «Mandati» (FRETILIN).
Deputada Helena Martins Belo (FRETILIN).
Deputado Joaquim dos Santos «Boraluli» (FRETILIN).
Deputado António Moniz Calau (FRETILIN).
Deputada Maria Anabela Sávio (FRETILIN).
Deputada Nurima Ribeiro Alkatiri (FRETILIN).
Deputado José da Cruz (FRETILIN).
Deputada Cristina Yuri (FRETILIN).
Deputado Abílio Quintão Pinto (FRETILIN).
Deputado Florentino da Costa «Sinarai» (FRETILIN).
Deputada Mariquita Soares (FRETILIN).
Deputado Óscar Lima (FRETILIN).
Deputada Irene Gonzaga Sarmiento (KHUNTO).
Deputado António Verdial de Sousa (KHUNTO).
Deputado António Verdial Ferreira (KHUNTO).
Deputado Luís Roberto da Silva (KHUNTO).
Deputada Olinda Guterres (KHUNTO).
Deputado Abel dos Santos (PLP).
Deputado Hélder Freitas «Kamarudin» (PLP).
Deputada Maria Angelina Lopes Sarmiento (PLP).
Deputado Adolfo Martins (PLP)».

Sr.^a **Presidente:** — Srs. Deputados, ita iha 64 Deputados mak halo votação, ha'u husu ho respeito ba Sr. Deputado António da Conceição, bele? Ho Deputado Armando, tanba tuur iha-ne'ebá

besik hela, bele ajuda tau matan ba escrutínio. Ou prefere ha'u hili husi partido seluk? Tanba rua PD hotu. Se prefere, então Sr.^a Deputada Sancha ho Sr. Deputado António da Conceição. Bele?

Ha'u husu ho respeito bele tau matan hela ba escrutínio ba votação, é só formalidade *sebenarnya*. Faz favor, bele mai hola fatin.

Técnico husi DIPLLEN, Quintiliano Ase no João Guterres, halo contagem voto husi escrutínio secreto.

Sr.^a **Presidente:** — Srs. Deputados, enquanto ita hein ata resultado, ha'u atu fó lembra de'it katak iha convocatório husi GMPTL para encontro às 15h00 da tarde iha sala conferência GMPTL nian, sala da reunião, para liga ho assuntos do Grupo das Mulheres Parlamentares.

Nune'e mós ha'u atu hato'o katak, AIPA (*ASEAN Inter-Parliamentary Assembly*), ita seidauk iha grupo, ne'ebe ita sei sai hanesan observador. Com certeza ba futuro ita iha seriedade ba ASEAN, ita mós iha futuro, ita sei haree ba estatuto para haree membro hira, será que hanesan ho AP-CPLP ho IPU, também ha'u seidauk hatene, assessor sira haree.

APA (*Asian Parliamentary Assembly*) ita membro ona, maibé composição sei haree ba estatuto, e, ho votação ida-ne'e ha'u espera katak AP-CPLP ho AIPA tem que forma nia mesa, - ho IPU, *sorry*, tanba iha convites ona iha oin. Ne'ebe, hato'o Ita-Boot sira-nia mesa, sé-sé mak iha-ne'ebá.

E também uma chamada de atenção para o Protocolo do Parlamento para hodi haree passaportes diplomáticos ho seluk-seluk ne'ebé ita tem que prevê antes da saída dos Deputados, tanba iha passaportes diplomáticos balu ninia prazo liu menos de seis meses não pode sair. Ne'ebe, protocolo também tem que ver este assunto.

Ne'ebe, ha'u husu atenção ba ita hotu.

Ha'u hanoin, ita iha ona contagem de votos, 59 a favor, contra 4, abstenção 0, ida branco, ne'ebé total dos Deputados 64, condiz ho ida ohin.

Ne'ebe, nia votação mak ne'e, dala ida tan ha'u fó lembra atu formaliza nia mesa para ita bele hatene.

Hodi nune'e, Srs. Deputados, ita atrasa uitoan bá almoço, maibé agradece ba Ita-Boot sira-nia paciência, bom almoço e continuem os trabalhos que já têm.

Muitíssimo obrigada.

E mais uma vez, até depois.

Horas hatudu tuku 13 liu minuto 14.